

## Enleitunk

### Welkom no de 30-Doag Aunspornunk toom dien Ehemau Moot toosprääkjen!

Daut naum nich väl Wääkjen von befriet sennen bat ekj enwort daut miene Enstalunk un Wied huden een grooten Endruck aun mien Maun. Ekj hab de fäichkheit Robert Moot to jäwen un daut hee sikj wietjeacht feelt. Oba ekj hab uk de fäichkheit-----mea aus irjents een aundra Mensch en sien Läwen-----am rauf to brinjen un Mootloos to moaken.

Ons fält daut aula daut ons opprechtich jesajcht woat von soone waut ons daut baste kjanen un ons halpen kjennen blinje Städen to seenen waut wie veleicht äwahaupt nich moakjen. Oba onse fäichkheit, toom deemootje, behelplichet kjritisieren jäwen un daudet goot aunjenomen woat es gaunz doavon aufhenjich woo sea wie ons aunstrenjen toom daut Jeschenkj jäwen von Moot toosprääkjen.

Wääjens ekj weet woo wichtich (un hinjaloten) dit Jeschenkj es en väle Ehes. Ekj hab Frues foaken aunjespornt dise 30-Doag Aunspornunk toom dien Ehemau Moot toosprääkjen to doonen. Dusende Frues han no mie jeschräwen toom mie weeten loten woo dise eefache aunstrenjunk äa Hoat je'endat haft äaren Maun jäajenäwa. Väle han uk metjedeelt woo daut äa Maun sien Hoat je'endat haft an jäajenäwa.

De Aunspornunk haft twee Deelen:

1. *Fa de näakjste 30 Doag, saj nuscht negatiewet von dien Maun ----to am ooda no aundre von am.*
2. *Jieda Dach, fa de näakjste 30 Doag, saj dien Maun irjentswaut waut die aun am jefelt ----un saj daut uk to aundre von am!*

Morjen anfangen, fa de näakjste 30 Doag, woascht du een email kjrieen met een Bibel Varsch, ne korte Aundacht von eent von onse “*Daut Hoat Nie Moaken*” Metoabeida, un froagen toom äwa nodenkjen----jeieejent toom Jnod un Moot plaunten en daut Veheltnis met dien Maun. Jieda Dach woat doa uk noch een kortet Zeichnis sennen von wäm dee dise Aunspornunk jedonen haft un sach waut daut fa een unjascheet muak en äa Läwen un Ehe.

Opp ne Schol von 1-10, es diene Ehe veleicht -2 nu krakjt. Ooda daut jeit veleicht goot too, oba doa es rum toom vebätren (soo aus doa emma es!). Dise kjliene Aunspornunk woat jun Veheltnis emmahan nich äwa eene Nacht gaunz omdreien. Oba wan du fa de näakjste 30 Doag doamet woascht aunhoolen, denkj ekj daut woat die ve'endren. Un met de Tiet, wan du de Grunt von dien Maun sien Hoat wessren woascht met oppbuen un wietachten, sitst du veleicht uk woo hee endren woat. Emmahan, du kaust nich orrajcht gonen.

Mucht de Har die Moot jäwen wan du dien Maun Moot moakst!

Nancy DeMoss Wolgemuth

## **Dach 1: Sprääkj diene Dankboakjeit ut**

**Von Mindy Kroesche**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Äa Maun sien Hoat kaun sikj ruich opp ar veloten. See woat daut aun nuscht fälen loten. See deit am goodet un nuscht schlaichtet soo lang aus see läft. Spricha 31:11-12*

### **Aundacht**

Ekj woa dän Dach niemols vejäten aus mien Maun mie fruach toom met am befreien. Ekj wia huach enne Wolkjen wääjens dis Maun wäm ekj soo goot wia haud mie jroz jefroacht toom siene Fru sennen! Nu, 20 Joa lota, sie ekj noch eensjemol vewundat daut ekj met am toop läwen kaun. Oba doa sent uk Tieden von vedrisslichkjeit, Oajanis, un am fa jlikjeltich nämen.

Met mea aus 6.6 billionen Menschen opp onse Welt, hast du mol äwa daut Wunda jedocht von 2 Menschen waut sikj wälen äare Läwes to vebinjen met eene Ehe? Ut aul de Frues enne Welt, wäld dien Maun sikj hantjäwen no die. Hee funk die auntrakjent un deed die wieetachten. Hast du am mol bedankt doafäa?

Wan omstend en diene Ehe uk jewakjselt han von dän Dach aus du dien Vesprääkjen jeefst, es daut wichtich dien Maun daut weeten loten daut du froo best daut Gott junt toop jebrocht haft un daut du west fa am een Säajen sennen. Moak secha daut hee weet daut du bie am steist un met am best----eendoont waut passieet.

### **Jebäd**

*Himlische Voda, ekj well mien Maun goodet doonen met am Moot toosprääkjen fa de nääkste 30 Doag. Moak mien Hoat wieekj am jääjenäwa, un wies mie woo ekj miene Dankboakjeit bäta utsprääkjen kaun. Wies mie woo ekj kaun bie am stonen soo daut ekj kaun sien jratsta Biestona sennen.*

### **Ne Jeschicht von Preisen**

“Ekj see woo mien Maun oppdacht wan ekj siene Gowen un Deensten eenselt positiew utdrekj. Ekj feel mea eenichkjeit----wiet mea----en ons Heim. Ekj sie soogoa äwarauscht daut ekj mien Maun hia *mie* mea Moot toosprääkjen. Daut es äwaschlont!”

### **Nodenkjen un Aunwenden**

- Denkj die noch woo du die feelsd aus dien Maun die fruach toom met am befreien? Woo kaust du daut Jefeel trigj kjrieen wan du Dach-fa-Dach enne Ehe omjeist?
- Waut sent eensje Uasoaken wua du dankboa fa best dien Maun? Woo kaust du dise Dankboakjeit am jääjenäwa vondoag utsprääkjen?
- Woo kaust du dien Maun jeneiw wiesen daut du am biesteist?

## **Deepa gonen**

Eent von de baste jelääjenheiten Dankboakjeit ut to drekjen es fuaz zemorjes. Woo deist du dien Maun jieda zemorjes bejreesen? Woo es eene Wajch woo du kaust am diene Leew vesehren wan de Dach aunft?

## **Dach 2: Bemoakj de Wäaj woo hee deent**

**Von Betsy Gómez**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Deent soo daut see weeten daut jie an goot sent. ---Galata 5:13*

### **Aundacht**

Eent von de sindvolle aunjewanheiten von onse Hoaten es nich dankboa sennen. Wan wie nich de Jnod waut wie rom ons seenen kjennen wieetachten (un daut woat to ne aunjewanheit), näm wie boolt aules soo jlikjeltich. Eene Städ wua ekj mott oppmoakjsam un dankboa sennen es en daut waut wieetachten waut mien Maun em Deenst deit fa onse Famielje. Ekj kaun daut boolt jewant woaren daut hee met dee Husoabeit halpt ooda met dee Kjinja un dan de Jeläajenheit vespälen toom am weeten loten woo sea ekj sien Deena Hoat jleich.

Lot nich ondankboakjeit die veblenden to woo dien Maun deenen deit. Sieekj vondoag no kjliene Wäaj woo hee siene Leew wiest fa die un june Famielje. Bedank die bie am un lot am weeten woo wieetvoll die sien Deenst es.

### **Jebäd**

*Har Jesus, dankscheen fa mien Maun. Jeff mie de Demoot waut mie fält toom Diene Jnod en sien Läwen seenen. Moak miene Uagen op no de väle Wäaj woo hee siene Famielje un aundre deent, un jeff mie de Freid daut bekaunt to moaken. Ekj bäd met Hopninj, wäajens ekj weet Du best de jratsta Deena.*

### **Ne Jeschicht von Preisen**

“Ekj hab dise Aunspornunk mau 3 Doag trigj aunjefongen, un ekj see nu aul ne Endanis---en mien Maun uk en mie! Ekj säd jistren owent to mien Maun daut dise Aunspornunk haft mie jeholpen to seenen daut hee een Deena Hoat haft un daut mie daut leet deed daut ekj dit nich aul lang enjeworden wia. Sien Jesecht dacht opp un hee kjrieech een frintel aum Jesecht!”

### **Nodenkjen un Aunwenden**

- Deist du dien Maun foaken denkjen halpen von Dinja rom em Hus waut nich foadich jemoakt sent? Wan jo, woo kaust du leewa wiesen no de Wäaj woo hee june Famielje deent?
- Woo deit diene toofrädenheit auleen aun Jesus finjen die leiden dankboa to sennen fa aundre?
- Woo kaust du daut ne aunjewanheit moaken aum enj vom Dach dankboa sennen fa dien Maun?

## **Deepa gonen**

Denkj aun Wääj woo du dien Maun bedanken kaust fa sien Deena Hoat. Wan jie Kjinja han, näm an uk met enn un moak dankboa sennen een Poat von waut june Famielje wietvoll es. Schriew am een Zadel ooda bedank am ver aundre, oba aum dolsten, froag däm Harn die een dankboaret Hoat to jäwen.

### **Dach 3: Eew die en Jeduld to dien Maun**

**Von Heidi Jo Fulk**

#### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt---un saj aundre daut uk von am!

#### **Bibel Varsch**

*Een jeduldja Maun es bāta aus een Kjrieja, un eena dee sikj selfst beharschen kaun aus eena dee eene Staut ennemt. ----Spricha 16:32*

#### **Aundacht**

Jedult es bāta aus Macht? Jo. Jedult----met ne goode Enstalunk luaren ooda nich kjritisieren----kaun mea jewennen un dien Maun oppbuen en Wāaj waut Macht eewen niemols kunn. Du kaust Jedult fa dien Maun eewen lieren met dān Heiljen Jeist loten kontrollieren woo du die vehoolen woascht un diene Jefeelen enne medd von ne vedrissliche, oajaliche ooda lankwielje Loag. Dān Heiljen Jeist siene kontrol es needich fa dien Hoat, Jedanken, un Mul.

Fa de Jedult waut die jroz krakjt fālt un de schwoare, lange Tiet toom luaren wua du veleicht medden mank best, kaun Jedult soo sennen aus ne Saulw waut daut leichta moakt. Wan diene Uagen dan wellen groot oprieten wan du sitsst daut dien Maun waut “de orrajchte Wajch” deit ooda die jankat oppjāwen met luaren daut Dinja endren woaren, wāl die leewa jeduldich to sennen.

#### **Jebād**

*Har, Diene heilje Krauft jeft ons aules waut wie brucken fa Lāwen un jettlichkheit, soogoa Jedult. Ekj jāw miene selfst-sieekjende Jedanken un velangen no Die. En dee āare Stād, froag ekj auf de Heilja Jeist wudd kontrol nāmen von miene Jedanken, Hoat, un Mul soo daut ekj wudd de Jedult un aunhoolen haben waut mie met mien Maun fālt. Bu Jedult opp en mie soo daut ekj kaun mien Maun oppbuen.*

#### **Eene Jeschicht von Preisen**

“Ver dise Aunspornunk, wia mien Maun kolt, ziemlich too, un rād nich vāl to mie. Ekj wull nich met am rāden, veschliet noch Moot toosprāakjen, un ekj funk aun am uk nusht toom Moot toosprāakjen. Derch dise Aunspornunk un Jebād, hab ekj jeseenen woo mien Maun siene Enstalunk mie jāajenāwa sea ve’endat haft. Hee deit nu kjlienichkheiten fa mie un em Hus waut hee ieescht faust niemols deed, un hee es uk dolla op to mie. Ons Veheltnis haft soo sea jewossen daut ekj hab kunt seenen waut fa een wietvolla Steen ekj hab en mien Maun un toom am mea rāakjnen.”

#### **Nodenkjen un Aunwenden**

- Woo kaust du die aunwanen daut baste to denkjen von dien Maun ea du die waut dietlich moakst?
- Woo kaust du vondoag een bāt Jedult bewiesen soo daut diene Jedult kaun wausen fa jratre schwoare Omstenden?

## **Deepa gonen**

Stal diene Utsecht un Velangungen en. Dien Wajch un dien Wunsch es nich daut latste; Gott siene sent. Sieekj am bätä to kjanen soo daut diene Jedanken un Hoat woaren von Am jeformt woaren. Bloos Gott kaun de deepste Velangungen von dien Hoat erfellen.

## **Dach 4: Low dien Maun siene Oabeit**

**Von Monica Hall**

### **Diene Aunspornunk**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Oabeiden gonen un opprechtich met siene Henj sien Broot vedeenen. ----Efeesa 4:28*

### **Aundacht**

En äwa 18 Joa von befriet sennen, haft mien Maun aus een Jugent Prädja jeschaufft, aus een UPS Pack Vehendla, een Kjoakjen Plaunta, een Ersaz Liera, un aundre veschiedene Oabeitstäden, foaken schauft hee met 2 ooda 3 von dee toojlikj.

Veleicht hieet sikj die soont bekaunt, ooda veleicht es dien Maun bie de Oabeitstäd jebläwen wua hee mol daut ieeschte aunfunk. Veleicht deist du die wenschen wan dien Maun bloos mol ne Oabeit funk, irjents Oabeit. Eendoont en waut fa Loag wie sent, mott wie no Wääj sieekjen toom onse Mana Moot toosprääkjen en äare Oabeit.

Gott haft Mana eenseloatich jemoakt toom Sien Ebenbilt droagen. Daut schient soo aus wan see oppjewekjelt sent met een stoakjen, ennalichen Drief toom vesorjen. Eent von de Dinja waut ne Fru kaun doonen waut daut dolste Mootloosichkjeit brinjt es äaren Maun dolranen opp dise Städ waut de meddelpunkt von siene Menlichkjeit es. Grunzen wääjens siene Oabeits Stunden ooda äwa waut hee vedeent ooda emma schellen daut hee saul mea doonen ooda bäta doonen woat am rauf brinjen. Kjijk leewa no Wääj woo du am kaust oppbuen. Dank am fa de Oabeit waut hee deit. Wan hee nich Oabeit haft, low daut waut du aun am sitst waut am wudd een gooda Oabeida moaken. Lot am weeten daut du am respakjten deist fa schwoa oabeiden wua du am betrachten kaust.

### **Jebäd**

*Jesus, dankscheen fa woo Du hast mien Maun jeformt un begoft fa de Oabeit waut hee doonen kaun. Halp mie siene Oabeit to unjastetten un am besondasch lowen fa waut hee deit. Jeff am Ensecht fa woo siene Gowen woaren dien Rikj buen un aundre deenen. Jeff am daut velangen tru to sennen met siene Gowen un dee vollopp to brucken. Beschitz am von Mootloosichkjeit, Stress, onopprechtichkjeit, un ful sennen soo daut hee kaun Dien Nomen Iea brinjen.*

### **Ne Jeschicht von Preisen**

“Ekj sie befriet met een onjleewenden Maun, un ieescht wia mie daut schwoa waut aun am to finjen toom am Moot to toosprääkjen un lowen. Ekj fruach Gott daut ekj wudd kjennen mien Maun seenen met Siene Uagen, un oo, Hee deed! Ekj bedank mien Maun fa de kjliene Dinja waut hee *deit*, soo aus daut Mell rut droagen, waut met brinjen vom Stua oppem Wajch nohus, un soowaut. Nu kaun ekj de wichtje Dinja seenen waut hee deit fa mie, un dan rääkjen ekj am noch mea. Wan dien Maun Moot toosprääkjen uk mau kjlien aunft, kaun Gott doa väl jratret von moaken aus waut du die väastalen kaust!”

### **Nodenken un Aunwenden**



- Wanea hast du daut latste mol dien Maun bedankt fa siene Oabeit moaken un fa de Famielje vesorjen?
- Waut sent eensje Ieejenschoften waut du aun dien Maun sitst waut am een gooda Oabeida moaken? Toom biespel, es hee aunhoolent? Opprechtich? Opp to veloten? Veantwortlich?

### **Deepa gonen**

Nemm die vää dien Maun to lowen fa siene Oabeit. Wan dit en june Ehe ne schwieeje Sach es, kunn daut schwoa sennen Wääj finjen toom dien Maun Moot too tosprääkjen. Froag däm Harn die jewesse Ieejenschoften to wiesen aun dien Maun waut du opprechtich lowen kaust.

## **Dach 5: Waut es opp Diene Tung?**

**Von Shiela Dougal**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Rät nuscht, waut dän näakjsten schoden kaun. rät bloos daut, wuaderch dee jeholpen woaren, dee junt hieren. ---Efeesa 4: 29*

### **Aundacht**

Auf dien Maun tru Jesus nofoljen deit ooda nich jleewen deit, es daut leicht siene Sind un Schwakheiten to seenen. Un daut es leicht jedonen en diene Sind un Schwakheiten Wied brucken waut am dolrieten. Oba Jesus well han du saust dise sindvolle aunjewanheiten opphoolen ea de *Jedanken* to *Wied* woaren.

Froag dän Heiljen Jeist diene Tung to bewoaren. Wan daut uk mucht goot un rajcht sennen Sind ooda orrajcht en dien Maun sien Läwen rut to tieekjnen, kaust du Wied brucken waut von een deemootjet Hoat komen un too de Loag pausen toom am oppbuen. Wäl die am de selsje Jnod to bewiesen waut du west han daut hee die bewiesen saul. Oba, Jnod bewiesen meent nich daut du de Sind betuttascht ooda soo deist aus wan du daut nich enwoascht; daut es leewa dän Hiera oppbuen wan ne Kloag mott verendach jebrocht.

Bemoakj vondoag waut fa Jedanken die enkomen von dien Maun. Ea du Wied latst ut dien Mul rut komen, denkj doaäwa aus daut waut du sajen west von een sindvollet velangen kjemt äwa am to harschen ooda von daut velangen am opp to buen. Vehandeld ieescht met diene Sind von Stoltheit. Froag Gott no Jnod toom met dien Maun räden äwa waut die besorcht moakt un Weisheit toom de rajchte Wied finjen toom am oppbuen.

### **Jebäd**

*Voda, ekj bekjan daut ekj mien Maun hab doljeräten met miene Wied. Ekj froag om vezeiunk. Halp mie no pausende Tieden to sieekjen toom Wied räden waut Jnod brinjen no mien Maun siene Uaren. Halp mie nich soo doonen aus wan ekj siene Sind nich enwoa ooda betuttren oba ieescht met miene ieejne Sind vehandlen soo daut ekj kaun deemootich met mien Maun räden met Jnod opp soone Wajch waut am oppbut.*

### **Ne Jeschicht von Preisen**

“Aun Dach 17, vefieed mien Maun mie aus hee dit säd. ‘Leefste, ekj sie een hoada Maun jewast un ekj bruck goanich soo sennen to die. Ekj weet kjeen aundra aus du waut wudd bie mie bliewen. Wuascht du mie vezeien? Wow! Mie ried daut soo aun daut hee soo opprechtich un voll Leew wia. Dise Aunspornunk haft nich bloos mien Maun ve’endat, oba daut haft mie uk ve’endat. Daut halpt mie äwa to denkjnen woo ekj sull mie oppfieren to am un oppausen waut ekj saj.”

## **Froagen toom äwa nodenkjen**

- Waut baudat die daut dolste von dien Maun?
- Es daut werkjlich Sind en am waut die baudat ooda bloos witzjet ooda veschiedenheiten en woo jie denkjen?
- Woo west du han saul dien Maun die diene Sind aunbrinjen? Woo kaust du am uk soo aankomen?

## **Deepa gonen**

Woo jeit daut soo wiet met dise Aunspornunk? Wan du uk nich Endanissen sitst, jäw nich opp! Sieekj wieda no Wääj dien Maun Moot too tosprääkjen un bäden daut de Har woat doonen “mea aus wie ons denkjen ooda vestonen kjennen” (Efeesa 3:20)

Nemm die vondoag Tiet toom denkjen äwa waut fa Wieed du brukst met dien Maun. Wan du jemeenlich diene Wieed brukst toom am dolrieten, sat dien Ziel dise Sind ver Gott to bekjanen ea du to am een Wuat sajchst. Mau nodäm sust du no dien Maun gonen. Saj am ieescht daut goodet waut du aun am sitst. Dan, to de rajchte Tiet met Wieed von Jnod, saj diene besorchnissen opp soonen Wajch daut dien Maun weet daut du best opp siene Sied.

## **Dach 6: Moak Siene Kreativität Groot**

**Von Erin Davis**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Waut jie doonen, doot aules om Gott to ieren. ----1 Korinta 10:31*

### **Aundacht**

Mien Maun es een werkjicha Deschra. Hee woat oppjerächt wan hee een feinet biet Lada sitt ooda een schmocket biet Holt. Siene Jedanken schaufen emma 10 Staup veropp, Jreblen waut hee daut näakjste buen woat. Mie jefelt dit von am, oba ekj mott toostonen daudet nich emma soo wia.

Hee es een Maun met väle Hobbies un Talenten; ekj sie dolla soo daut ekj bloos eenatlei lieren kaun.

Hee mucht aulahaunt utprowen, un daut jeft foaken väl schwienarie un Sachen waut nich foadich jemoakt sent; ekj mucht leewa eent no daut aundre foadich moaken soo daudet jeit aun to tieekjnen oppe List. Hee jleicht Dinja rajcht jedonen han; ekj mucht dee bloos foadich kjrieen.

Oba ekj hab jeliect mien Maun siene Kreativität wieet to achten wiels ekj see daut aun aus ne Wajch von woo mien Maun en Gott Sien Ebenbilt es.

Gott es onen Moten kreativ. Hee foaft Sonn oppgank un Sonn unjagank met dusende kalieren. Hee haft mea aus 10,000 sorten Väajel jemoakt. Hee haft riesende Jebirje ut Steen jemoakt un Diamanten waut doa blenkjren ut Carbon. De Schepfunk es emmahan uk onen enj un foaken jeft daut schwienarie, oba sent wie nich dankboa daut wie soon kreatieven Gott leewen un deenen?

Sie oppmoakjsom no dien Maun siene kreatieve sied. Deit hee baustlen, buen, ooda foawen? Schauft hee aun Foatieja ooda deit hee Jitoa spälen? Lot am weeten daut du dit enwoascht un een jefaulen hast doaraun daut hee en dise hinsecht aundasch es aus du, un bedenkj: Lieet dien Maun siene kreativität die waut äwa Gott Sienen Karakta?

### **Jebäd**

*Himmlischa Voda, wies mie woo Du mien Maun oppjehoakt hast toom Dien kreatievot Hoat spieejlen. Lia mie ne unjastettunk to sennen soo aus hee siene Gowen un Talenten brukt toom Problemeen leesen, aundre deenen, un daut Rikj wieda brinjen. Dankscheen fa Diene kreativität wiesen derch mien Maun fa Diene Iea!*

### **Ne Jeschicht von Preisen**

“Dise Aunspornunk es een Säajen jewast, nich bloos en miene Ehe oba uk fa mie perseenlich. Mien Maun es bloos soo väl leefolja un met mie toop jestemt jewast. Ieescht wull ekj de Aunspornunk nich doonen, oba daut haft mie oppmoakjsom jemoakt no miene Oppgow aus ne Fru toom emma achtjäwen un goodet sajen too mien Maun un von am. Daut haft de Enstalunk en ons Heim je’endat.”

## **Nodenkjen un Aunwenden**

- Opp waut fa Wääj es dien Maun kreatiev?
- Deist du am Moot toosprääkjen ooda aufroden von kreatiev sennen?

## **Deepa gonen**

Moakjst du dien Maun siene kreatievität un deist de aunerkanen? Ooda deist du daut kjritisieren un too nuscht moaken wan hee sikj doarenn eeft? Ennestäd negatiew sennen, näm die vää positiev to sennen. Moak sien Dach scheena met am ver aundre lowen waut hee jeleist haft.

## **Dach 7: En Eenichkjeit met Jelt Sachen**

**Von Kathy Needham**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----to am un to aundre von am!

### **Bibel Varsch**

*Soo aus ekj haundel, es jerajcht; ekj hool mie aun waut rajcht es. Ekj vesorj dee rikjlich dee mie goot sent, un moak an de Schauzkoma voll. ----Spricha 8:20-21*

### **Aundacht**

Wan daut metem Jelt schwoa jeit es daut foaken Uasoak fa oneenichkjeit un mestrusch sennen enne Ehe. Doa es väl Angst un duaren vebungen met Jelt----ooda wanet aun Jelt fält---un dan kaun daut heet hää gonen un Weedoag aunrechten. Dise Aunspornunk haundelt nich om ons Jelt vesehren, oba onse Ehes vesehren. Un eensjemol toom daut doonen, mott wie ons Ziel tosied saten fa ons Jelt.

Ekj meen doamet nich daut jie aule Weisheit rut schmieten wääjens jun Jelt. Oba ekj doo froagen: best du wellich dien Maun Moot too to sprääkjen un opp dise Städ loten de Leidaschoft to nämen, wan daut uk meent hee woat waut föla moaken ooda nich emma soone Sachen Wieet schazen waut du denkst daut hee sull?

Saj dien Maun vondoag daut du siene Leidaschoft vetruen deist en Jelt Sachen. Sieekj no Wääj am en dit to lowen. Es hee spoasom? Läft hee benna een jesadet Ziel? Haft hee waut äwrich fa aundre? Deit hee weis investieren? Denkt hee äwa de Tookunft? Saj am die jefelt soone Dinja, un wanet fält, stal daut trajcht wan du negatiew doawääjen jerät hast. Wan hee hia en schwak es, bäd fa am un sieekj no Wääj woo du kaust behelplich sennen, un nich am wääjens daut schljajcht behandlen ooda schljajcht von am räden . Organisia Zadels un Rääkjnungen, un froag am woo du am halpen kaust.

### **Jebäd**

*Voda, jäw mie de Krauft Die to vetruen un mien Maun unjadon sennen, wääjens ekj weet daut Du woascht no onse Famielje oppausen. Lia mie to danken, Moot toosprääkjen, un mien Maun to halpen ennestäd to kjritisieren, grunsen, un hindren. Moak ons en eenichkjeit met onse Jelt entscheidungen, wan daut uk woat meenen daut Du mie ieescht motst ve'endren. Säajen mien Maun met een weiset Hoat waut een velangen haft Die to Ieren met aules waut wie ieejnen.*

### **Ne Jeschicht von Preisen**

“Doa wieren een poa Dinja waut ekj aul fa Moonaten wull han waut mien Maun doonen sull ea ekj dise Aunspornunk aunfonk. Eenatlei wia nich soo väl Video Games spälen. Daut aundre wia een Probleem leesen met onse Jelt Jeschichten. Ekj wull nich bloos emmawajch prachren, un wort mie eenich ekj wudd luaren bat dise Aunspornunk toom enj wia. Na, Gott bewees sikj jewess! Aum ieeschten Dach, wort mien Maun sikj eenich aule Video Games opp to jäwen un sien PlayStation wajch saten. Hee haft aul äwa eene Moonat nich Video Games jespält. Un dise Wääkj, aus de Aunspornunk jroz toom enj jekomen wia, haft hee sikj äwanomen onse Jelt Sachen ut sikj selfst trajcht to oabeiden, woont ne groote Laust von mie wajch nemt. Preis däm Harn!”

## **Nodenkjen un Aunwenden**

- Deist du june Famielje äare Jelt Sechaheit unjastetten ooda hindren?
- Sent june striedarie wäjens Jelt wäjens perseenliche velangungen? Wan daut es, woo kaust du dien perseenlichet Velangen tosied saten un dien Maun Moot jäwen toom Leiden?

## **Deepa gonen**

Auf dien Maun stoakj ooda schwak es en Jelt Sachen, kaust du june Jelt Sachen stoakjen met am Moot toosprääkjen en waut hee goot deit un am Jnod jäwen wua hee schwak es. Froag woo du am aum basten opp soone Städ halpen kaust. Näm die vondoag vää nich to kjritsieren un Mootloos woaren wan jie junt wada nich eenich sent oba leewa met Jnod un Hopninj.

## **Dach 8: Vetruen Plaunten**

**Von Monica Hall**

### **Diene Aunspornunk**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die von am jefelt----un saj aundre daut uk von am!

### **Bibel Varsch**

*Wäa kaun eenen frommen Mensch finjen, opp dän to veloten es?----Spricha 20:6*

### **Aundacht**

Dusende Joa trigj, deed de Schriewa von Spricha 20 aunerkanen daut een Mensch finjen wuaropp to veloten jeit nich ne leichte sach es, un daut es vondoag nuscht aundasch. Onse Kultua deit untru sennen, trajcht räden un soogoa tooroden. Foaken, feelt een Maun veleicht daut hee en een eensomen Feit es siene Ehe tru to bliewen, no sienen Harn, un siene aundre Veautwuatungen.

Aus ne Fru, kaust du Sot von Vetruen plaunten en dien Maun sien Hoat. Du kaust sien Moot moaka sennen toom auhnoolent bliewen un nich oppjäwen. Du kaust ne Städ von Jnod sennen to am wua hee kaun handreien wan hee en Vesieekjungen kjemt. Du kaust saunft am de Woarheit sajen wan hee Mootloos es. Un wan hee stolpat, kaust du am met Jnod un Vezeiunk annämen wan hee Busse deit.

Du deist dit veleicht läsen met een vebroaknet Hoat wäajen dien Maun es untru jewast. Wan daut soo es, sieekj die jettlichen Rot toom die halpen met Biblische Ensecht verhandlen. Un vetru daut en diene dunkleste Weejefeelen, blift Gott tru un jerajcht.

Noch een Wajch toom dien Maun Moot moaken toom tru bliewen es selfst tru bliewen. Muchst du opp Christus Siene Jnod ruen toom tru waundlen no Am un uk no dien Maun.

### **Jebäd**

*Har Jesus, fläaj en mien Maun een truet Hoat; waut een velangen haft opprechtich to sennen un met hanjäwende Leew schält. Wies mie woo ekj kaun Sot plaunten von tru sennen derch woo ekj mie oppfia no mien Maun un woo miene Enstalunk es to am, un halp mie to luaren no Diene Arnt en sien Hoat.*

### **Ne Jeschicht von Preisen**

“Ver dise Aunspornunk, “stuckad” daut en onse Ehe; daut wia sea prost. Doa wort trajcht jeschräajen un domm jesajcht un wie hauden emma to jachten äwa dewautsche kjlienichkjeiten. No bloos twee Doag, kaun ekj seenen woo ons Veheltnis wada nie woat soo aus daut verhää wia ea wie aul dit Schunt leeten tweschen ons komen.”

### **Nodenkjen un Aunwenden**

- En waut fa Wäaj sitst du daut dien Maun tru es?
- Deist du met dien Läwen wiesen daut du tru best? Best du ne Fru waut äa Wuat helt?



## **Deepa gonen**

Fang aun to kjikjen no bewies daut dien Maun tru es, un räd doavon wan du waut finjt. Lot am weeten woo väl du daut rääkjenst wan hee opprechtich un tru es. Schriew am een Breef un bedank die daut hee tru es enne medd von ne Kultua waut nich tru es.

## **Dach 9: Nemm die Tiet Toom Horchen**

**Von Betsy Gómez**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die von am jefelt----to am un to aundre von am!

### **Bible Varsch**

*Siet schwind bie de Sach toom horchen, äwalajcht goot ea jie räden. ----Jakobus 1:19*

### **Aundacht**

Aus mien Maun ne Klaus neem aun Biblischet Kaunslen, wia eent von siene Oppgowen daut wie wudden met sien Liera toop kaunslen loten. De aufsecht wia daut hee wudd aun de sied sennen waut sikj kaunslen leet un doavon lieren. Aules schauft fein ... batem enj. En däm Moment, kjikjt de Kaunsla mie enne Uage un säd, "Best du mol enjeworden daut du disen Maun nich räden latst?" Ekj vefieed mie, un mien Maun säd (met de baste Aufsecht), "Oba ekj woa soont nich emol en." De Kaunsla säd, "Na, daut es krakjt de Trubbel!"

En däm Moment wort ekj en daut ekj nich met Aufsecht lieed stell to sennen aus een bewies von Leew no mien Maun. Soont waut soo eefach scheen brukt woaret Leetsennen, wääjens väl räden kaun bewies sennen von een stoltet Hoat. Nu es jieda Dach ne fresche jeläajenheit mien Maun Leew to bewiesen derch stell sennen met een Hoat waut reed es toom horchen.

Vondoag, froag däm Harn die to wiesen auf doa irjentwua ne Sind stakjt waut du bekjanen sust. Jäw dien velangen opp toom räden, un jäw dien stell bliewen un oppmoakjsomkkeit no dien Maun aus een bewies von diene Leew fa am.

### **Jebäd**

*Har Jesus, moak miene Uaren op toom werkjlich no mien Maun horchen. Lia mie jeduldich sien Hoat hinjaraun to gonen met rechtje froagen stalen. Moak mie nieschierich no aul daut wieetvolle waut en siene Hoat un Seel vestoaken sent. Halp mie daut to ieren waut hee metdeelt met mie un daut niemols brucken aus Scheetich jäajen am.*

### **Eene Jeschicht von Preisen**

"Dise Aunspornunk es een Säajen jewast un haft mie de Uagen un daut Hoat opjemoakt to Städen en miene Ehe wua väl Rum wia toom vebätren. Daut kjeem nich bloos aules glaut hää un wia eensje Doag sea aunstrenjent, wääjens ekj bloos soo wieetich sie! Doa es ne Uasoak toowaut ekj 2 Uaren hab un bloos 1 Mul, soo dan lua ekj un horch ea ekj räd un jäw dän Heiljen Jeist ne jeläajenheit mien Mul no to komen ea daut wajch rant."

### **Nodenkjen un Aunwenden**

- Froag dien Maun no soont wua hee sea en intresieet es un horch jeneiw no siene auntuaden.
- Froag am no Wääj woo du am bäta deenen kaust. (Doo nich vesieekjen to entschuljen ooda die rajchtfoadjjen; horch bloos.)

## **Deepa gonen**

Jäw dien Maun daut Jeschenkj von diene oppmoakjsomkjeit un stell bliewen. Paus opp nich äwamoten froagen to stalen daut hee räden mott. Bliew bloos aunhoolent met diene Leew un intressen to bewiesen. Doo aufsechtlich am mank aundre loten daut ieeschte räden un doo am nich ver aundre trajchtwiesen. Hool em denkj daut dien vâl räden bewiest nich dien Wieet.

## **Dach 10: Denkj doaraun: Du hast am jewält**

**Von Mindy Kroesche**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Ach mien Schauz, daut best du dee mie schmock lat, opp iernst sea schmock. --Leet 1:16*

### **Aundacht**

Eenatlei waut mie aum aunfank trock no mien Maun wia daut hee voll spos wia. Mie jefoll daut wan hee wääjens sikj selfst lachen kunn un daut ons de selfsje sposjes lachaden. Ekj wort uk schwind en daut hee respakjt un leew haud fa siene Famielje un sien velangen Gott to veharlichen met siene Wieed un waut hee deed.

Dit es noch emma aules soo bie mien Maun. Oba no 20 Joa von befriet sennen, saj ekj am daut nich mea soo foaken aus aum aunfank daut mie soont jefelt. Wanea hab ekj am daut latste mol jesajcht daut ekj mie frei daut hee soo hanjejäft es nom Harn? Opprechtich jesajcht, mie denkjt nich mol wanea.

Wan daut dan de Ieejenschoften sent waut ons aum aunfank no dise Mana trocken ooda Dinja waut wie mette Tiet hant schazen jeliheet, sull wie äwaludes sajen daut ons soont jefelt. Onse Mana motten weeten daut wie an wieetachten un leewen. See motten enwoaren daut wie denkjten see sent besondasch un wellen een deepret Veheltnis han met an.

*Froag die vondoag, Waut es mie wieetvoll aun mien Maun? Woo kaun ekj am mien bewundren bewiesen? Dan näm die Tiet am daut to sajen!*

### **Jebäd**

*Jesus, ekj bekjan dautet foaken leichta es to kjritisieren aus bewundren. Halp mie aun to denkjten woosoo ekj em ieeschten faul mien Maun wäld un wies mie Ieejenschoften wua ekj sie blint to jewast. Halp mie Wieed von bewundren to räden un moak en mie fresch ne deepe, bejeistade Leew fa mien Maun.*

### **Ne Jeschicht von Preisen**

“Gott haft dise Aunspornunk jebrukt toom mien Maun un mien Veheltnis omformen. Jieda Dach wia ne groote Help. Oba, aun Dach 10 räd de Har mie sea aun. Aus ekj daut “Deepa gonen” deed, wees de Har mie daut ekj haud too sea jekjikjt no wua mien Maun unvollkommen wia daut ekj haud vejäten waut Gott wull han daut hee sennen sull: een wundavollet, rikjlichet Jeschenkj. Ekj haud dit Jeschenkj jlikjeltich jenomen un doaderch vebruak ekj onse Ehe. Von dan aun, kaun ekj nich jleewen woo daut omjedreit haft en onse Ehe. Mien Maun feelt sikj nich bloos dolla jeleeft un wieetjeacht, oba deep en mien Hoat feel ekj uk Leew un wieetachten fa am.”

### **Nodenkjen un Aunwenden**

- Woont sent atliche Ieejenschoften waut die no dien Maun trocken ea jie befriet wieren?

- Woont sent 3 Dinja waut du nu krakjt wieetachten deist von dien Maun?
- Waut es een *praktischa* Wajch woo du kaust dien Maun wieetachten un bewundren bewiesen?

### **Deepa gonen**

Denkj aun de Dinja waut die aum aurfank no dien Maun trocken. Wia daut woo hee jleicht spos to han? Siene leeftole Uagen? Siene Leew fa däm Harn? Dan schriew am een Leewbreef un saj am aules wua du aun am een jefaulen hast un bewundren deist, un lot dän opp sien Kjessen, oppem Freestikj Desch, ooda irjentswua wua hee dän vesecha finjen woat.

## **Dach 11: De Krauft von Respakjt**

**Von Leslie Bennett**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----to am un to aundre von am!

### **Bibel Varsch**

*Un jie Frues, siet june Mana soo unjadon, aus jie däm Harn sent. ----Efeesa 5:22*

### **Aundacht**

Eensje Äwarauschungen sent scheen; aundre sent nich.

Gaunz onverhoffs, deed mien Maun wua opp to veloten wia dän gaunzen Plon endren fa onse Pensionierunk (wan wie nich mea utoabeiden wudden). Wie wieren korz no een kjlandret Hus jetrocken aus hee gaunz onverhoffs väaschluach wada omtosiedlen, no ne aundre Städ 100 Miel auf. Veschrocken un velazt, horcht ekj nich no sien Droom aus de määjlichkkeit fresch omtosiedlen een striet wort en onse Ehe. Nodäm daut ekj fa Moonaten ieejensennich siene Leidaschoft jewäat haud, holp de Har mie aun dise Woarheit denkjen ut Efeesa 5:22: *Jäajenaun sennen no mien Maun es krakjt soo aus jäajenaun sennen no Am.*

Een poat von respakjt wiesen no onse Mana es unjadon sennen no siene Leidaschoft: “Wiels de Maun steit äwa siene Fru, soo aus Christus äwa siene Jemeent steit, fa dee hee sikj selbst hanjeef äa Heilant to sennen” (Efeesa 5:23):

Unjadon sennen no onsen Maun siene Leidaschoft jeit scheen wan wie en eenichkkeit sent; wan ons eenen aundren Wajch wudd dolla jefaulen ooda wie jleewen daut dee wudd bäta sennen; es daut schwoa. Oba kjikj daut aun derch de Schreft. Daut es ne scheene jeläajenheit auf to spieejlen woo Jesus de Sän unjadon wia no Gott Sien Voda. Ne Fru spieejelt Jesus Sien Hoat----Siene Leew, opfren, un demoot----wan see wellich äaren Maun respakjt.

### **Jebäd**

*Voda, vezei mie fa de tieden wua ekj Dien Mossta fa de Ehe vedreid wua ekj mien Maun nich respakjten deed. Har, mie fält Diene Halp toom am ieren aus ne Wajch toom Die ieren. Jäw mie Christus Siene demoot, aus Hee Sien Kopp buach nom Voda. Doo onse Ehe omformen no een läwendjet Bilt vonne Schreft---Dien Veheltnis met diene Brut, de Kjoakj.*

### **Ne Jeschicht von Preisen**

“Fa mien Maun bäden haft miene Ehe no ne aundre Stufe von toofrädenheit jebrocht. Wie wieren fa 3 Joa befriet un wieren onjlekjlich. Wie wieren beid Christen aus wie ons befrieden, oba wieren beid schloff en Däachliche Aundachtstieden haben. Ekj funk mie aun to oajren wääjens am wääjens hee sull de Jeistlicha Leida sennen en ons Heim. Aus ekj doafäa bäden deed un am mea Moot toosprääkjen, funk hee aun to wausen un haud mea velangen sikj enne Schreft to beschafftjen. Jenuach, daut hee haud miene Jebäda jespäat, un hee wist nich daut ekj dise Aunspornunk deed, oba hee bedankt sikj daut ekj fa am bäden deed. Ekj jleew von Hoaten dit haft onse Ehe jerat.”

### **Nodenkjen un Aunwenden**

- Moak ne List von dien Maun siene Ieejenschoften waut die jefaulen.
- Sieekj no jelääjenheiten wua du kaust am hieren en met Wieed oppbuen.
- Froag Gott die dee Städen to wiesen wua du die wäaren deist jääjen dien Maun siene Leidaschoft, dan sieekj no vezeiunk----ieescht bie Gott dan bie dien Maun.

### **Deepa gonen**

Näm die vondoag Tiet toom no dien Maun horchen un bestädich siene Leidaschoft. Froag no sien Rot fa Entscheidungen un Proowen waut du hast. Lot am weeten daud du siene Meenunk respakjten deist un siene Weisheit, Unjastettunk, un Leew aunemst aus dien leefolja Poatna. Äwanäm die waut browet----daut näakjstemol wan jie toop mank Menschen sent, finj waut toom am belowen wan aundre horchen.

## **Dach 12: Daut es Tiet Toom Daut Hoat Unjasieekjen!**

**Von Mindy Kroesche**

**Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut von am!

**Bibel Varsch**

*Siet bescheiden, frintlich un jeduldich. Siet junt soo goot, daut jie junt unjarenaunda vedroagen. ----Efeesa 4:2*

**Aundacht**

Häw diene Haunt opp wan du mol hast aunjefongen met Ekserseis doonen un jerääkjent hast daudet om een poa Doag aul sull rut wiesen. (Ooda veleicht no eemol Sport moaken.)

Wan ekj miene Haunt huach häw, weet ekj goot daut haft kjeen Senn. Ekj weet en mien Kopp daut woare Endanis woat Tiet nämen, un doch rääkjen ekj met daudet fuaz rut wiesen saul.

Veleicht best du uk opp soone Städ en dise 30-Doag Aunspornunk. Felt die daut schwoa dien Maun Moot toosprääkjen? Es daut schwoa jewast nich kjritisieren un leewa Wieed von bewundren räden? Du denkst veleicht, *Ekj hab mie soo aunjestrenjt en dise Ehe, un doa haft noch nuscht je'endat!*

Well wie vondoag ne Hoat unjasieekjunk moaken! Du deist veleicht aules krakjt rajcht, oba de Trubbel kaun sennen daut du met too väl rääkjenst. Krakjt soo aus ekj em stellen Hop daut de Wichtschole woat väl läaja wiesen nodäm daut ekj mie foaken enne rund jedreit hab, du rääkjenst veleicht met too väl too schwind.

Soo dan, nemm die Tiet toom bäden, un froag Gott die to wiesen wan du onmäsigch väl (ooda soogoa ommääjlichet) von dien Maun velangt hast. Un daut wichtichste, es jäw nich opp, wiels “wan wie nich mootloos woaren, woa wie arnten, wan daut ieescht Tiet doatoo es” (Galata 6:9)

**Jebäd**

*Har, unjasieekj mien Hoat fa Wäaj wua ekj hab too väl velangt von mien Maun. Halp mie no Die to komen met miene onerfelde bederfnissen, un lia mie Die to vetruen toom en miene Ehe schaufen----en mien Maun un uk en mien ieejnet Hoat. Halp mie wieda goodet to doonen soo daut ekj kaun Dien Säajen arnten.*

**Ne Jeschicht von Preisen**

“Dise Aunspornunk wia scheena un schwanda aus ekj mie väastalen kunn. Ekj docht ekj wia ne ermootjende Fru; ekj wort en daut ekj wia nich. Daut wia fa mie deemootjent mien Maun fa 30 Doag Moot toosprääkjen! Gott wees en Siene groote Jnod mien stoltet Hoat un de needichkjeit emma wada Busse to doonen. Ekj hab een Väanämen dit noch wieda to doonen, daut gaunz vom freschen äwa doonen bat ekj bat doa senn daut mien Maun Moot toosprääkjen, woat ne aunjewanheit woaren. Mien Maun sien Erfolg fa de ermootjungen? Aules positiew. Hee jeft mea Acht opp mie un es leefolja, un hee horcht mea no mie.”



## **Nodenkjen un Aunwenden**

- Wua hast du äwamoten vâl von dien Maun velangt?
- Woo kaust du doavon loos loten un dien Maun derch Uagen von Jnod aunseenen?

## **Deepa gonen**

Näm die Tiet toom dolschriewen waut du bat hiatoo hast fa Endanissen jeseenen derch dise Aunspornunk, wanet uk mau kjlienichkjeiten sent. En dien Maun ooda en die. Dan bedank die bie dien Maun waut hee en june Ehe deit, un lot am loos von waut de Har die jewäsen haft wua du äwamoten vâl von am velangt hast.

## **Dach 13: Sie Nich Toofräd Met ne Leewloose Ehe**

**Von Kelly Needham**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Ekj jehia mienem leefsten, un hee haft velangen no mie. ----Leet 7:11*

### **Aundacht**

Een goodet sexuelet Veheltnis nemt väl Oabeit; daut passieet nich bloos von selfst. Dan es daut kjeen Wunda daut väle Lied Spaunungen un Weejefeelen enne Schlopstow befinjen ennestäd erfreschunk un Freid. Gott haft de befriede eenheit enjerecht toom een froet räajelmäsjen bewies sennen von Leew. Daut sexuele Läwen es Gott Siene Idee, Sien goodet Jeschenkj fa onse Ehe. Dan sie nich toofräd met ne Leewloose Ehe. Fang vondoag aun to bäden daut Gott junt wudd beid halpen ne Freid han aun dit Jeschenkj un junt wiesen waut doa em Stich steit daut junt daut nich scheen jeit.

Negatiew sennen----jääjen onsen Maun ooda jääjen ons selfst----moakt de eenheit doot. Fang aun fa bejeistade Leew to feiten met dien Maun ermootjen. Bewies met Wieed un waut du deist daut du muchst jieren met am toop sennen. Drei am nich wajch wan hee die aunkjemt oba bedank am leewa daut hee die auntrakjent finjt. Saj am waut die jefelt von am aus Leew jäwa. Saj daut en eenselheiten. Un dan feit fa Leew derch negatiewe Jedanken rut schmieten jääjen die selfst----auf daut ossechaheit es wäajen dien Kjarpa, diene Perseenlichkheit, ooda irjentswaut aundret. Denkj doaraun daut de mieeschte Mana han een velangen no eenheit met äare Frues. Sien velangen es no die. Vetru en siene Leew.

Fa eenje von junt, best du veleicht dolla intresieet en Sex aus dien Maun. Woa nich mootloos met dise schwieeje Loag! Weet daut Gott diene Loag sitt un waut rom jeft. Sieekj Am fa Weisheit un eenichkheit opp dise Städ, un sieekj no aundre Wäaj toom dichtaun sennen un omzajcht aunschieren. Doo goot toohorchen, un näm daut nich too perseenlich. Daut woat emmahan nich äwanacht endren, oba hool aun met dien Maun ermootjen un bäd jieda Dach fa am. Doa es emma Hopninj fa dee waut en Gott vetruen.

### **Jebäd**

*Har Jesus, eendoont woo ekj bat hiato jekjamft hab, Ekj well nich tofräd sennen met ne leewloose Ehe. Moak mie frie von orrajchtet denkj en heel mie von vegangne Sinden un Schaund. Lot en mie een grootet velangen no mien Maun wausen un de jewessheit toom am aunkomen un daut aunämen wan hee mie aunkjemt. Jäw mie Weisheit en woo ekj am ermootjen kaun opp dise Städ----un jäw mien Hoat uk Moot!*

### **Ne Jeschicht von Preisen**

“Ekj funk dise Aunspornunk aun ut Vetwiewlunk, un nu kaun ekj met Woarheit sajen daut mien Maun un ekj daut erfoaren daut wie woare Frind sent, Leew han, un respakjt eena fa däm aundren----ons jeit daut soogoa scheen! Un ons sexuelet Läwen toop es väl bäta jeworden, soont waut ekj docht niemols en miene Läwestiet vebätren wudd. Dise

Aunspornunk es bloos noch wada een biespel daut wan ekj wellich woa, deit Gott mien Hoat un Läwen endren.”

### **Nodenkjen un Aunwenden**

- Woo kaust du vondoag dien Maun aus een Leewjäwa bestädjen?
- Waut fa Jedanken Mostasch stemmen nich mette Woarheit opp dise Städ en dien Läwen?
- Opp waut fa Wajch kaust du vondoag wieetvolle Tiet met dien Maun flääjen?

### **Deepa gonen**

Wan du foaken dien Maun aufwiesen deist wan hee well Sex han, froag Gott daut Hee die wiesen wudd wuarom du daut deist. Eset wääjens diene Oabeit aunjewanheiten? Woo du met de Kjinja omjeist? Nich wellich sennen toom Tiet nämen toom toop sennen? Du sust veleicht daut trajchtstalen met dien Maun fa irjents mootloosichkjeit ooda aufschuwen waut du am aunjedonen hast. Sieekj een Wajch dien Maun vondoag to wiesen daut du een velangen hast no am, veleicht met een romantischen Zadel schriewen ooda met een langen Kuss wan hee nohus kjemt. Jie woaren beid stolpren wan jie de Staupen nämen no ne Ehe voll Leew, dan näm die vää du woascht Jnod jäwen fa fäla un stolpren.

## **Dach 14: Een Maun von Opprechtichkeit**

**Von Heidi Jo Fulk**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bible Varsch**

*Wäa sikj nich veschulcht haft, woat secha gonen, oba wäa kromme Wäaj jeit, woat utjefungen woaren. ----Spricha 10:9*

### **Aundacht**

Opprechtich läwen es aunstrenjent. Ne rajchte Enstalunk han äwa de Welt kaun ons reed moaken toom stoakj stonen. Paulus beschreef en 2 Timotäus 3:2-5 met waut wie rääkjen kjennen:

Menschen woaren väl von sikj selfst hoolen, nom Jelt hinjaraun sennen, sikj selfst huachhoolen, jääjanaun sennen, Lastren, de Elren nich jehorchen, ondankboa, onheilich sennen, dee woaren sikj nich goot sennen un nich veseenen loten, sikj unjarenaunda spotten un veachten, sikj nich beharschen un onbandich sennen, daut goode nich lieden kjennen, sikj unjarenaunda veroden, ruchloos un stolt sennen met daut, waut see sikj enbillen, un daut Vejniecejen leewa haben aus Gott. See jäwen noch vää gottesferchtich to sennen, oba jleewen nich aun siene Krauft. Von soone Menschen bliew wajch.

En ne Kultua waut voll von aul soone Sind es, woo deit dien Maun doa rut tieekjen?

Es hee opprechtich un jerajcht met Menschen? Deit hee siene Wied ieren met waut hee deit em Heim, enne Jesalschoft, un enne Kjoakj? Opp waut fa Wäaj deent hee june Famielje un aundre? Haft hee een opprechtjen Gloowen? Denkj aun aul de Wäaj woo een Maun kaun bewiesen daut hee opprechtich es, un low dien Maun wan hee von dise Ieejenschoften bewiest.

Wan du wieda jeist en dise 30-Doag Dien Maun Moot Toosprääkjen Aunspornunk, näm die vää doano to kjikjen woo dien Maun jääjen de Kultua steit met opprechtichkeit.

### **Jebäd**

*Himmlischa Voda, wuascht du mien Maun Krauft jäwen opprechtich to vehaundlen, Jnod leef to han, un demootich ver Die to waundlen? Lot am bewust sennen no schwacke Städen rom siene Jedanken un Hoat. Wies am woo hee kaun opprechtich waundlen met sikj derch Jebäd stoakjen, derch Dien Wuat, un veauntwuatlichkeit. Beschitz am von beaset. Wies mie woo ekj am lowen kaun un Moot toosprääkjen stoakj to bliewen en waut hee deit.*

### **Ne Jeschicht von Preisen**

“Mien Maun waundelt nich met däm Harn, un wie gonen derch ne besondasch schwoare Tiet. Ekj velua miene Freid aun befriet sennen un mien vetruen en siene opprechtichkeit. Dise Aunspornunk kjeem aus een Säajen von Gott. Ekj kjrieech jieda Dach freschen Moot, besondasch derch Bibel Varschen waut ekj utwendich wist oba

mie nich opp veloten deed. Ekj haud de Trubbels en mien Läwen de Krauft jejäft. De Aunspornunk holp mie Gott wada de Kontrol to jäwen. Ekj sie väl ruja, un rääkjen mien Maun mea. Hee haft no miene fresch jefungne Freid un Moot jeauntwuat.”

### **Nodenkjen un Aunwenden**

- Waut es eene Wajch woo dien Maun siene opprechtichkjeit die ooda june Ehe beschitst haft?
- Sitst du waut fa een Einfluss dien Maun siene opprechtichkjeit haft aun siene Frind ooda june Kjinja?

### **Deepa gonen**

Bäd pinkjlich fa dien Maun siene opprechtichkjeit, daut hee wudd jehia jäwen no dän Heiljen Jeist en aul siene Wäaj. Soo aus du jeläajenheit hast---wanet pausent es---deel met aundre met wua dien Maun es een Väabilt jewast en opprechtich un ierenhauft sennen met aundre. Besondasch, wan jie Kjinja han, wies an siene opprechtichkjeit. Diene Jebäda un Wieed woaren am stoakjen.

## **Dach 15: Sien Gott Nofoljen**

**Von Monica Hall**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Oba waust en Jnod un aun Erkjanntnis aun onsen Harn un Heilant Jesus Christus. -----  
2 Petrus 3:18*

### **Aundacht**

Dien Maun Moot toosprääkjen Gott notofoljen es werkljich wichtich. Oba, daut brukt Ensecht un Demoot toom daut doonen opp een Wajch waut nich diene Roll aus siene Fru äwastaupt. Woo kaust du Moot moaken onen leiden?

Eene Wajch es toom froagen woo du kaust fa am bäden. Am froagen no eenselne Bedden metdeelen wiest daut du waut romjefst om waut am wichtich es, un daut kaun am ermootjen en siene ieejne Jebäda. Wan du froagen hast ute Bibel, froag am no Halp ennestäd nom internet ooda een Studium sieekjen. Wies am daut die siene Jedanken aun Jeistliche Sachen wichtich sent.

Ekj hab to tieden mien Maun jesajcht waut ekj wudd wenschen daut hee doonen wudd toom Leiden en Jeistliche Sachen, waut am säd daut hee nich jenuach deed en disen Faul. Ekj docht ekj wia behelplich met Väaschläaj jäwen. Ekj deed oba krakjt daut jääjendeel. Wan dien Maun nich Gott nofolcht ooda Jeistlich Leiden deit, drei nom Harn un vetru Am toom en dien Maun sien Hoat oabeiden. Daut es veleicht schwoa stell to bliewen, oba wan du aunhoolent bäden deist, am ermootjen en kjliene Sachen, un nich "behelplichen Rot" jäwen, woascht du däm Harn ieren un nich dien Maun mootloos moaken.

### **Jebäd**

*Har Jesus, äwa aulet aundre en miene Ehe, well ekj han daut mien Maun saul een fruchtboaret un wausendet Veheltnis han met Die. Jäw am een velangen Die to kjanen un ieren en jieda Städ von sien Läwen. Vezei mie fa woo ekj sien Gloowens Waundel jekjritisieet hab ennestäd am ermootjen Die notofoljen. Dankscheen fa am dolla leewen aus waut ekj doo un met am wellen Jemeenschoft han.*

### **Ne Jeschicht von Preisen**

"Ekj sie aul fa lenja aus 20 Joa een Christ jewast, oba mien Maun haft nich soon Waundel. Ekj hab am foaken jefroacht toom met mie toop Bibel Studium doonen un hee haft daut emma aufjesajcht, dan weet ekj daut hee nich väl Bibel Varschen weet toom oppsajen. Vondoag zemorjes, wuak ekj opp un hee kjikjt mie bloos aun, strikjt mie nat aum Jesecht, un funk aun Spricha 31 opptosajen to mie----woo wietvoll ekj sie to am, woo ekj emma met am toop jeschaufft hab un am leew bewäsen eendoont waut, woo ekj sie goot jewast met de Jelt Sachen, un soo wieda. Mien Maun haft noch niemols ea soo siene Jefeelen metjedeelt met mie. Ekj jleew dit es wääjens ekj no june Aunspornunk

jehorcht un aunjenomen hab, un de Har haft aun mie jeoabeit. Hee haft mie un miene Enstalunk ve'endat."

### **Nodenkjen un Aunwenden**

- Hast du dien Maun ermooticht en sien Waundel met Gott ooda am vesocht jeistlich to leiden derch am vääschlemmen?
- Best du selfst tru en dien Waundel met Gott?

### **Deepa gonen**

Denkjt die noch wää dien Maun wia aus jie junt toom ieeschte mol troffen? Haft hee aul jewossen? Wan jo, dan saj am daut. Hee woat veleicht nich en waut Gott aul aules jedonen haft. Wan du werkjlich nich seenen kaust daut hee jewossen haft, hool aun met bäden un vetruen un sieekj no Wääj toom am Moot moaken daut siene Jedanken no Jeistliche Sachen dreien opp soone Wajch waut nich een vääschlemmen es un kjritisieren deit.

## **Dach 16: Dien Lävespoatna**

**Von Shiela Dougal**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj daut uk to aundre von am!

### **Bibel Varsch**

*Un Gott de Har säd: “Daut es nich goot, daut de Mensch auleen es. Ekj woa wäm moaken toom am halpen, dee am pausen woat.” ----1 Mose 2:18*

### **Aundacht**

Eensomkjeit es een Probleem, een grootet. Een Studium funk ut daut de halft von aule Menschen enne Welt feelden sikj eensom. Oba Gott haud aum aunfank eenen Plon toom eensomkjeit leesen: eena enaunda. Enne Ehe, de “eena enaunda” Kua es een Maun un eene Fru met äare Lävses soo vebungen daut see eent sent en Gott Siene Uagen.

Oba aus Sinda eset soo leicht jedonen ons Ziel han opp woo onse Mana tookort komen aun dee Lävespoatna sennen waut wie velangen. Wan die daut schwoa felt dien Maun auntoseenen aus een leewa Poatna, hia opp met no am kjikjen un kjikj no waut Christus haft jedonen fa die. Dan nemm de Jnod waut du jeschmakjt hast un finj een Wajch woo du kaust fa dien Maun soon Frint sennen aus du die wenschen deist.

Mien Maun haft emma aulahaunt em dreien. Hee wudd die sajen hee wia een “workaholic” (soona waut too vâl Tiet jeft toom oabeiden). Un daut es fa mie leicht jedonen doano to kjikjen woo weinich Tiet wie han fa Jemeenschoft. Oba ekj hab jeliheet met stendich en Gott sien Wuat sennen, bäden, un aun Jesus Siene Leew fa mie denkjen, kaun ekj rut gonen no wua mien Maun schaufen deit, mien Haunt opp siene Schulla lajen, derch spos han een bät met am vetalen un am waut aunbeeden toom äten ooda drinkjen, un dan halpt mie daut em Jedenkj to hoolen daut dis Maun es bloos een Maun. Soo aus ekj, es hee nich de basta Poatna. Oba met Jnod, kje wie toop derch dit schwoare Lävsen gonen.

### **Jebäd**

*Himmlischa Voda, vezei mie fa soo leicht no mien Maun siene schwakheiten kjikjen ennestäd siene Stett un Frint sennen wua hee sikj aun länen kaun fa Help un ermootjunk. Stoakj onse eensichoatje vebindunk aus Maun un Fru, un halp mie Wäaj to finjen woo onse Jemeenschoft kaun deepa woaren.*

### **Ne Jeschicht von Preisen**

“Dise Aunspornunk haft een grooten Endruck jehaut opp miene ‘goode’ Ehe en bloos 7 Doag. Ekj hab een grooten Schups von Freid jeseenen en mien Maun met bloos am seenen frintlén un nohus komen no ne Fru waut äaren Dank bewiest. Ekj sie emma froo jewast fa mien Maun oba nich opp soone Wajch daut aundre rom mie daut bemoakjten. Derch dise Aunspornunk hab ekj jeseenen woo miene Ehe wada kaun romantisch sennen un Freid brinjen kaun no mien sea aunjestrenjda Maun. Dit wia werkjlich ne auntuat fa miene Jebäda.”



## **Nodenkjen un Aunwenden**

- Derch eensome Tieden en diene Ehe, woo kaust du Troost finjen en Christus?
- Woo kaust du dien Maun bejäajnen doa wua hee es soo daut jie kjennen deepa vebungen woaren?

## **Deepa gonen**

Velang dien Maun aus dien Lävespoatna. Deel kjlienichkjeiten un groote Norechten daut ieeschte met am met. Doot plonen toom toop Tiet vebrinjen, aufet es toop rut foaren ooda auleen tus bliewen, ooda moak met en de Sachen waut am intresieeren. Bestädich de Wäaj woo hee dien basta Frint es un woo froo du best daut Gott am jejäft haft dien Lävespoatna to sennen.

## **Dach 17: Daut Heim Jebut met Weisheit**

**Von Betsy Gómez**

### **Diene Aunspornunk:**

- Saj nuscht negatiewet von dien Maun---to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*De Weisheit fangt aun wan eena däm Harn fercht; dän Heiljen kjanen lieren, brinjt Vestentnis. ---Spricha 9:10*

### **Aundacht**

Aus Frues, doo wie entwäda ons Heim oppbuen ooda dolrieten. Daut enj doavon es aufhenjich von auf wie Weisheit wälen ooda Dommheit (Spricha 14:1). En werkjlichkjeit, well kjeena siene Famielje vedoawen, oba em Läwen eset soo eefach jedonen onse Jedanken un velangen no de Welt äare Dommheit hanjäwen.

Woare Weisheit es bloos en Gott Sien Wuat to finjen, un daut kjemt derch däm Harn ferchten (Spricha 9:10). Jakobus 3:17 sajcht ons daut “de Weisheit von bowen es ieeschtens rein, dan frädlich, jelind, lat sikj sajen, es voll Metleet un goode Woakjen, es nich partieisch un heichelt nich.” Jiedatsmol wan ekj dän Aufschnitt läs feel ekj ne strenje Äwazeiunk em Hoat äwa miene needichkjeit to wausen en jettliche Weisheit. De goode Norecht es daut doa es Hopninj---wäajens Gott vesprakjt Weisheit to jäwen no dee waut daut fält un em Gloowen doano froagen.

Onen twiewel, es dien Maun eena von de ieeschte waut doa woat een Nutzen han von jettliche Weisheit. Hee woat dankboa sennen wan dien Läwen rein, frädlich, jelind, sikj sajen lat, voll Meetleet un goode Woakjen es, nich partieisch, un nich heichelt. West du nich soon Läwen fieren? Dan well wie ranen no de Städ wua Weisheit to finjen es!

### **Jebäd**

*Gott, ekj ran no Die, un sto too daut ekj opp väle Städten hab Dommheit jedräwen. Jäw mie een Darscht no Dien Wuat soo daut ekj kaun seenen wua ekj mie hab de Welt äare Mosstasch hanjeäft. Fell mien Hoat met Wunda un Forcht fa Die un lot daut to seenen sennen daut ekj soo jefelt sie en mien Veheltnis met mien Maun.*

### **Ne Jeschicht von Preisen**

“Daut es toom staunen woo krakjt de pausende Tiet oppkjemt toom jun Rot aunwenden toom mien Maun Moot toosprääkjen jieda Dach. Hee haft fa miere Joaren oppe Wäa jestonen jääjen mie, oba vondoag deed wie toop schaufen un ekj fruach am waut, hee jeef ne auntuwat aus wanet ne leichte froag wia. Ekj wort en daut hee auntuwad soo aus wan hee mie wada aunfunk to vetruen. Jie han mie Moot jemoakt un jeliheet woo ekj kaun de Fru sennen waut mien Maun fält.”

### **Nodenkjen un Aunwenden**

- Es woo du met dien Maun omjeist dolla soo aus Jakobus 3:14 ooda soo aus Jakobus 3:17?
- Hast du dien Maun schljacht behandelt?

- Wuascht du die jewoagen daut to bekjanen un om vezeiunk froagen?

### **Deepa gonen**

Denkj doaraun daut ne jettliche Fru äare Weisheit woat bewäsen derch woo see sikj oppfiheet ennestäd bloos waut see sajcht. Doo bewust dien Maun oppbuen met weisen Christlichen deenst.

## **Dach 18: Frieheit Toom Freid han aun Eena Enaunda**

**Von Erin Davis**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Een frooet Hoat deit krakjt soo väl goot aus Medizien. ----Spricha 17:22*

### **Aundacht**

Ella woaren un veauntwuatungen vebrääkjen leicht onsen janka toom spälen. Wää haft Tiet fa een scheen gonen wan doa emma soo väl to doonen es?

Oba ons Veheltnis met onsen Maun kaun soo aus een Daumpgropen sennen waut dän aldoagschen Druck kaun rut loten. Befriet sennen kaun (un sull!) scheen gonen.

Bedenkj:

- Sent de mieeschte unjahoolungen met dien Maun iernst un äwa Oabeits Sachen?
- Wan dien Maun mol spälrich jesonnen es deist du dan diene Uagen vedreien ooda schoape Wieed brucken?
- Fa Elren, deist du dien Maun Moot moaken ooda afroden von mette Kjinja spälen?
- Waut helt die wajch von bloos een *scheengonen* han aun dien Maun?

Horch no waut de Schreft aunbeeden deit: “Frei die to diene Fru, dee du goot best, un dee Gott die jejäft haft, soo lang aus du dit Läwen, waut nich to vestonen es, oppe Ieed hast; dit es waut du ut daut Läwen un ut diene Oabeit, met waut du die opp dise Ieed bemieechst, hast.” (Liera 9:9)

Doo mea aus bloos met dien Maun toop een Poatna sennen en de Oabeit waut junt tookjemt. *Hab ne Freid aun am!* Kjijkj no wua hee spälrich es un späl met am. Sieekj no jelääjenheiten toom toop daut Läwen mea jeniesen derch Games, Hobbys, ooda Erfoarungen. Waut kaust du vondoag doonen toom een scheengonen aunstalen?

### **Jebäd**

*Har Jesus, soo foaken nemt de Druck von dit Läwen äwahaunt un ekj näm aules soo iernst. Halp mie Freid han em Läwen, schwind lachen un spos han. Moak onse Freid jrata un onse Ehe ne Städ wua ons daut scheen jeit un wie toop lachen kjennen.*

### **Ne Jeschicht von Preisen**

“Ekj deed de 30-Doag Dien Maun Moot Toosprääkjen Aunspornunk. Daut schauft un deit uk noch schaufen. Daut deed fuaz fa ons beid aules omdreien. Daut es wundascheen wada ne Freid han aun mien Maun un toop lachen. Soogoa wanet opp Städen wada ruch wort, kunn wie daut bosich fresch omdreien. Ekj dank Gott fa mie de Uaren op moaken krakjt en däm Moment aus jie aum Radio räden deeden.”

## **Nodenkjen un Aunwenden**

- Wää es iernsta, du ooda dien Maun? Wää es spälaja jesonnen?
- Woo kje jie wausen en june veschiedenheiten mea wieetachten opp dise Städ?

## **Deepa gonen**

Doot waut toom scheen gonen. Denkj aun waut leichtet fa die un dien Maun toom doonen. Met ne Droak flieejen, toop Beisikjel foaren, een spos Film kjikjen, Frauen rieten----irjentswaut waut du die utdenkjen kaust toom een scheen gonen han met dien Maun vondoag.

## **Dach 19: Wundaboa Jemoakt**

**Von Mindy Kroesche**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Mien Schauz es jesunt un uk rodlich; hee es de basta mank 10,000 Mana. ---Leet 5:10*

### **Aundacht**

Daut ieeschtemol aus ekj mien Maun sach, docht ekj, *Wow, dee es groot!* Met 6'5 Schoo, tiekjent hee meist emma aulawääjen rut. Ekj woa jetrocken no siene lange Been, oba mie jefelt uk woo mie daut moakt Weiblich un beschizt feelen wan hee soo huach es. Ekj sie mau 5'3 Schoo, un ekj sie froo wäm to han waut no huaje Städen han kaun!

Waut mie noch jefelt aun mien Maun sien jelot sent siene kloa bleiwe Uagen, daut hee leicht frintelt, sien opprechtjet Jesecht, un sien dikjet wesch kruse Hoa. Un wan ekj am daut saj woo mie sien jelot jefelt, kaun ekj seenen woo siene Uagen oppdachen, sien frintel jrata woat, un hee waust meist bat 6'6" Schoo!

Wan wie onsen Poatna daut sajen waut ons aun sien jelot jefelt, feelen see sikj sechra un halpt an dichta aun no ons to feelen. Oba daut jääjendeel es uk soo. Doa es meist nuscht waut een Maun kaun dolla rauf schlönen aus jleewen daut siene Fru am nich schmock lat. Un wan du noch mol wääjen sien jelot spatren deist, sent daut Wieed waut du niemols kaust trigj nämen.

Nemm die dan vondoag noch Tiet toom dien Maun sien jelot lowen. Saj am du best froo daut Gott siene Oarms haft stoakj jemoakt, siene Schulren breet, siene Brost voll Hoa, ooda wautet mucht sennen von am waut die trakjt. Lot am weeten daut die am schmock sitt un daut du froo best daut hee dien Maun es.

### **Jebäd**

*Har, ekj dank Die fa woo du mien Maun jemoakt hast. Du hast am jeformt toom eensichoatich sennen. Halp mie vom freschen ne Freid to han aun mien Maun sien jelot. Vezei mie fa tieden wua ekj jekjritisieet hab un woo ekj ha mien Ziel jehaut opp waut onse Kultua fa schmock aunsitt. Halp mie nieet ut to denkjen toom mien Maun weeten loten daut ekj no am jetrocken woa, un lot daut onse Ehe stoakjen un uk siene sechaheit wan hee daut weet.*

### **Ne Jeschicht von Preisen**

“Mie denkjt aul nich woo ekj bekaunt wort met dise Aunspornunk, oba ekj weet daut wia aus een latsta Faul wääjens ekj wort emma negatiewa un kunn seenen woo daut lanksom onse Ehe vedommen deed. Daut es noch mau Dach 13, oba mien Hoat endat un ekj veleew mie fresch met mien Maun. Hee weet nich daut ekj dit doo, oba am jefelt daut woo ekj am behaundlen doo un lanksom un secha kjrie ekj daut trigj von am. Dise Aunspornunk haft mie uk perseenlich jeholpen un uk en onse Ehe toom spieejlen waut Gott vom aunfank fa ons haud.”

## **Nodenkjen un Aunwenden**

- Waut sitt die schmock aun dien Maun? Opp waut fa Wäaj haft Gott am eensichoatich jemoakt?
- Opp waut fa fresche Wäaj kaust du dien Maun weeten loten daut die am schmock sitt? Wan die dit schwoa felt, froag Gott toom die dolla trakjen no dien Maun. Veleicht kunn daut sennen met siene Uagen bewundren, sien frintlen, un soo wieda.

## **Deepa gonen**

Läs ne Fru äa beschriewen von äaren Veleewden en Leet 5:10-16. Soo aus dise Fru fa äaren Maun deed, näm die Tiet toom dien Maun sien Kjarpa bekjikjen, vonne Spetz Tee'en bat sien kolen ooda volljewossnen Kopp, un dank Gott daut hee "Wundaboa jemoakt es". Dan schekj am eene Leew Mensaje äwa Foon, lot am wua een Leew Breef, ooda saj am daut woo die am schmock sitt.

## **Dach 20: De Betre Wartlen Rut Growen**

**Von Erin Davis**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Siet leewa von Hoaten leefolich eena toom aundren. Vejäft junt unjarenaunda, soo aus Gott junt en Jesus Christus aules vejäft haft. ---Efeesa 4:32*

### **Aundacht**

Wan du nich wellich best dien Maun to vezeien, woat die daut schwoa faulen am Moot toosprääkjen. En dise Tiet en de 30-Doagsche Aunspornunk, kaun daut sennen daut de Har haft Städen opjedakjt wua bettanis jun Veheltnis vejefte deit. Nu es de Tiet toom vehaundlen met irjents Enstalungen waut du oppjespikjat hast wua du nich vezeien west. Vezei dien Maun, nich wääjens hee die nuscht haft aunjedonen waut die wee deit ooda soogoa wääjens hee daut wull trajchtstalen ooda hee ve-endat haft. Vezei dien Maun wääjens Gott *die* vezeit haft.

Hebräa 12:15 schrift soo, “Un seet doano, daut kjeena Gott siene Jnod vesiemen mucht. Lot kjeene betre Wartel oppwausen un Trubbel aunrechten, wuaderch väle veorreinicht woaren..”

Bettanis en june Ehe woat ne Arnt brinjen waut väle toosaten woat: dien Maun, diene Kjinja, diene Kjoakj, un diene Jesalschoft. Lod Gott en de Ieed von dien Hoat opp dise Städ to besorjen, un saj Am dien velangen aule bettanis rut to schaufen.

Es dien Maun eena waut doa vezeien deit? Helt hee diene Trubbels nich lang em Jedenkj? Bedank am doafäa. Späat sikj daut soo aus wan dien Maun waut jääjen die haft? Wan daut soo es, sust du Sachen trajchtstalen?

Eendoont woo dien Maun met sien Hoat omjeit, best du beroopen no frieheit von betre Wartlen. Froag däm Harn aule bettanis rut to driewen von june Ehe soo daut du kaust en frieheit waundlen en dien Veheltnis met am un aundre.

### **Jebäd**

*Himmlischa Voda, ekj hab jääjen Die jesindicht derch mien Maun rechten un aun am oajren. Vezei mie fa jiezich sennen met vezeien wan Du soo rikjlich jejäft hast. Fell mie met Leew un Metfeelen fa mien Maun.*

### **Ne Jeschicht von Preisen**

“Ojjefäa 2 Moonat trigj fungen mien Maun un ekj aun Trubbel to han met unjahoolungen han. De Baul funk aun en ne Rechtunk to kulren wua wie beid nich han wullen----oaja, bettanis, veoajren, ontofrädenheit, nich vebungen. Ekj hieed aul Moonaten trigj von dise Aunspornunk oba neem mie nich de Tiet daut to doonen. Ekj funk entlich doamet aun bie 14 Doag trigj, un ekj kaun nich utsprääkjen woo Dinja rom jedreit sent! Wie räden derch de Trubbels waut wie met eenaunda han un komen soogoa to een Entschluss en onse striedarie.”



## **Nodenkjen un Aunwenden**

- Kaust du aun Tieden denkjen wua bettanis jääjen dien Maun aundre toosaten deed buta june Ehe?
- Opp waut fa Wääj deit diene bettanis diene frieheit vestieren?

## **Deepa gonen**

Fang aun to growen. Froag däm Harn die de Wartlen von bettanis en dien Hoat to wiesen. Moak ne List doavon un froag Gott die to vezeien fa dien veojren. Dan wäl die dien Maun to vezeien doano aus Gott die väl vezeit haft.

## **Dach 21: Läden fa Daut Rikj**

**Von Heidi Jo Fulk**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*“Oba sieekjt daut ieeschte no Gott sien Rikj un no siene Jerajchtichkeit. Dan woa jie daut aundre uk aula kjrieen.” ----Matäus 6:33*

### **Aundacht**

Wan wie fa de Eewichkeit läwen, dan see wie aules waut wie denkjen, doonen, ooda sajen met een eewjet Utseenen. Bloos tweeatlei jeit enne Eewichkeit nenn: Gott Sien Wuat un Menschen. Moak secha daut dien Ziel es opp de rajchte Dinja----soogoa en daut Ehe Veheltnis.

Haft dien Maun siene Utsecht opp eewje Dinja soo daut hee kaun kortet Vejniecejen, Tietlichen Schauz, un Tietliche Wieetsachen aufsajen? Sieekjt hee no Gott Siene Iea ennestäd fa sikj? Sprääkj dien Dank ut fa waut dien Maun wieetschazt, un low am fa Gott Sien Rikj un eewje Sachen ver daut trakjen waut de Welt aunbeeden deit.

Wan dit ne schwoare Städ es fa am, betracht woo du daut waut du wieetschazen deist wakjslen kust un fa de eewichkeit läwen ver am, un am ermootjen daut uk to doonen. Näm die vondoag vää daut diene Wieed woaren dien Maun oppbuen, un am ermootjen fa Gott sien Rikj to läwen.

### **Jebäd**

*Jesus, ekj well weis Vewaulten met en eewje Dinja investieren. Halp mien Maun un mie to seenen wua wie ons denkjen un Ziel wakjslen sullen. Dan halp ons verrewajch to gonen en de Oabeit un Veheltnissen waut Du hast fa ons, soo daut onse Läden daut Ziel han opp Dien Rikj un waut Die wieetvoll es.*

### **Ne Jeschicht von Preisen**

“Mien Maun un ekj sent aul 31 Joa befriet, un ekj docht ekj wia ne sea ermootjende Fru. Dan deed ekj dise Aunspornunk. Daut wia toom vewundren woo sea ekj un mien Maun endaden. No bloos 5 ooda 6 mol waut ermootjendet sajen to mien Maun aun verschiedenste Doag, dacht hee jrodsoo opp! Sien gaunzet Vehoolen wakjseld. Ekj feeld mie soo schuldich fa woo ekj mien Maun haud soo jlikjeltich jenomen un bloos de Jedanken haud aun woo hee endren sull un waut hee wudd kjennen bäta moaken. Ekj doo dise Aunspornunk wada äwa, dautet saul ne aunjewanheit woaren!”

### **Nodenkjen un Aunwenden**

- Wua es dien Maun stoakj waut doa kunn jebrukt woaren toom Gott Sien Rikj wausen moaken? Woo kaust du am doa en Moot toosprääkjen wua hee stoakj es?
- Waut fa Sachen ooda Gruppen von Menschen es dien Maun no jetrocken en Metleet?

## **Deepa gonen**

Doot aufschazen waut fa aunjewanheiten ooda Lāwesstiel june Lāwes han waut nich Gott Sien Wuat un Menschen vāatrakjen doonen. Doot omstalen toom Gott ieren un zielt jun Heim mea opp daut Rikj.

## **Dach 22: Leeftolich Räden**

**Von Shiela Dougal**

**Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

**Bibel Varsch**

*Jun räden saul emma leeftolich un intressaunt sennen. ----Kolossa 4:6*

**Aundacht**

Mien Maun es (noch) nich een Christ, un dan feelen sikj de Wieed en Kolossa 4:6 sea pausent. De toopfotunk fa disen Varsch es dee waut ver disen kjemt: “Läft weis ver dee, dee noch nich to de Jemeent jehieren. Un doot de Tiet goot brucken” (v. 5). Paulus well han Christen sellen met Jnod un leeftolich läwen no soone waut noch nich äare Hopninj han en Christus.

Veleicht es daut dien Maun, oba wanet uk nich es, kjennen onse Mana sikj noch emol soo späaren aus wan see “buten” sent. Mana un Frues sent sea veschieden, un Gott haft daut soo jemoakt. Wie sellen eena dän aundren toop pausen, nich äwareen sennen. Oba de unjascheeden en woo wie daut Läwen aankjikjen, wan wie uk aul beid Christen sent, kaun de Mieej toom toop gonon äwamoten aunstrenjent schienen moaken.

Een Wajch woo wie dise veschiedenheiten kjennen aunräden es met leeftolich räden. Daut äwaje poat von Kolossa 4:6 vejlikjt leeftolich räden met Äten waut jesolten es. Eenjemol kaun sikj de Mieej met onse Mana toop to gonon derch onse veschiedenheiten soo späaren aus onjesoltnet Äten äten. Oba leeftolje Wieed soo aus, “Mie jefelt daut wan du \_\_\_\_\_, ooda “Ekj woa en woo sea du oabeiden deist un ekj rääkjen die vål,” ooda soogoa “Mie freit daut soo daut du \_\_\_\_\_; du halpst mie daut Läwen noch aundasch aankjikjen,” kaun een grooten unjascheet moaken. Wan du doa leeftolje Wieed nenstalst, woat daut dien Maun sien gooden “Schmak” vebätren.

**Jebäd**

*Voda, vezei mie fa soo leicht reed sennen toom no mien Maun siene veschiedenheiten wiesen soo aus wan dee orrajcht ooda schljajcht sent. Halp mie de veschiedne Jeschmacken waut mien Maun siene Perseenlichkjeiten en onse Ehe nenn brinjt vål to rääkjen. Halp mie Wääj to finjen toom leeftolich to am räden soo daut hee Christus kaun kloara seenen derch mie.*

**Ne Jeschicht von Preisen**

“Ekj sie aun Dach 14 von de Aunspornunk. Aun Dach 3, säd mien Maun, ‘Dankscheen fa de latste poa Doag nich opp mie rom klunjen´ Aun Dach 10, brocht hee mie eene Dutz Roosen. Aus ekj fruach too waut, säd hee, ‘Wääjens du soo metjeoabeit hast un nich nojeschowen. Du best soo vestentlich´ Hee es nich een Christ, oba dit moakt een grooten Endruck opp am.”

## **Nodenkjen un Aunwenden**

- Woo jeft die daut Moot wan du de veschiedenheiten tweschen die un dien Maun aunkjikst aus tooppausen ennestäd aus oppe Wad spälen?
- Waut fa Wieed kust du doa nenstalen toom dien Maun dise Wääkj Moot toosprääkjen?

## **Deepa gonen**

Bruck de Sauzen met diene ieejne Wieed doanen stalen toom leefolich to dien Maun räden un sieekj Wääj toom soont jäwen waut nich vedeent es un leefolichkheit no am met diene Wieed. Denkj aun Gott Siene leefolichkheit un Jnod fa die aus du noch Sien Fient wieescht, un nich Sien Sän achten deetst. Lot de Jnod waut Hee die jejäft haft opp diene Leppen sennen wan du met dien Maun rätst.

## **Dach 23: Siene Stoakje Sieden Wieetachten**

**Von Shiela Dougal**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Een jiedra haft siene Gow von Gott, eena soo un de aundra aundasch. ----1 Korinta 7:7*

### **Aundacht**

Wan onse Mana uk soon Gloowen aun Christus han aus wie ooda nich, sull wie kjennen de Gowen un Talenten seenen waut Gott an jejäft haft. Un jeweenlich, sent de Gowen waut Gott an jejäft haft aundasch aus onse. Foaken trakjt Hee 2 Menschen toop waut veschiedne stoakje Sieden un schwakheiten han met Fliet toom ons vebätren un ons halpen. Ennestäd no onsen Maun siene schwakheiten kjikjen, sull wie de stoakje Sieden oppbuen.

Es dien Maun jeorganisieet? Es hee flietich? Es hee aunhoolent? Dit haft aules to doonen met een Mosta von perseenlichen Dizeplien waut wieet es too lowen----wan sien Dizeplien un Ordnunk hoolen uk jäajen diene aunjewanheit jeit von Schloff sennen. Doo am oppbuen fa soone Ieejenschoften han un woo daut june Ehe halpt to Funkzionieren.

Daut kaun leicht sennen to jleewen wie kjanen onse Mana erno a goot----un wie kjanen an emmahan bäta aus aundre. Oba daut sull ons nich wajchhoolen von emma mea lieren äwa äare Hoaten un Perseenlichkheiten. Ennestäd onse Doag velenjd gonon met jleewen daut wie aules kjanen von onse Mana, welwe an beobachten, daut bemoakjen wua see goot en sent, un sieekjen no Wäaj woo wie an oppbuen kjennen.

### **Jebäd**

*Voda, wan ekj de veschiedenheiten see tweschen mien Maun un mie, sie ekj nochmol dankboa....oba eenjemol es daut schwoa. Lot mie mien Maun en Leew deenen, met de Gowen waut Du mie jejäft hast. Halp mie to lieren von mien Maun un to länen aun wua hee stoakj es. Fell mie vondoag met een wieetachten fa woo Du am jemoakt hast un halp mie lieren äwa sien Hoat soo daut ekj am lowen kaun un am oppbuen.*

### **Ne Jeschicht von Preisen**

“Ekj docht ekj wudd dise Aunspornunk utproowen aus eene Freundin daut em Facebook stald, wäajens waut kunn ekj doabie vespälen? Daut holp mea aus irjents een Teema aun Ehe ooda aundren Rot waut ekj mol ea jekjräajen haud. Weetst, ekj hab een jewaultjen Maun, oba ekj wist daut nich. Dise Aunspornunk brocht fresche stoakje Sieden en mien Maun jieda Dach. Ekj feel mie soo domm daut ekj am ver dit, nich wieetachten deed. Hee wia doa gaunz besied mie, oba ekj kunn nich *seenen*. Gott es goot un tru toom mie de Uagen opmoaken. Vondoag es Dach 30, un morjen well ekj vom freschen aunftangen un daut gaunze wada doonen. Onse Ehe von 18 Joa jinkj bloos jrodsoo velengd; nu es daut groosoaatijch.”

## **Nodenkjen un Aunwenden**

- Woont sent dien Maun siene stoakje Sieden? Woo paust daut toop met diene schwakheiten?
- Woo kaust du vondoag mea lieren äwa dien Maun soo daut du am ermootjen kaust?

## **Deepa gonen**

Du best aul äwa 75 Prozent derch met dise Aunspornunk! Hopentlich, woat daut leichta Wäaj to finjen toom dien Maun jieda Dach Moot toosprääkjen. Oba wan nich, froag Gott toom die jieda Dach niee bejeistrunk to jäwen.

Vondoag, denkj aun de stoakje Sieden waut Gott dien Maun jejäft haft, un uk de waut Hee die jeschonken haft. Finj Wäaj toom de fäichkjeiten waut Gott die jejäft haft to brucken toom dien Maun ut Leew deenen. Wie denkjen foaken aun de goode Oabeit waut Missionoaren doonen ooda fa dee vesorjen waut nich een Heim han ooda Weisenkjinja----aules sent goode Woakjen waut Gott ons veleicht jeft toom doonen, oba dien Maun leewen krakjt doa wua du best un am bedeenen soo daut hee no Jesus jetrocken woat es krakjt soon goodet Woakj.

## **Dach 24: Von Hoaten een Voda**

**Von Betsy Gómez**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Un jie Vodasch, vezoajcht june Kjinja nich. Trakjt dee christlich opp un doot dee em christlichen Senn trajchtwiesen. ----Efeesa 6:4*

### **Aundacht**

Ekj woss nich opp met mien Voda, soo, de ieeschte vehoolungen met een Voda em Heim wia met mien Maun. Aus wie jroz befriet wieren, wia ekj nieschierich waut fa een Voda hee wudd sennen, un vondoag dän Dach staun ekj wan ekj see waut fa een christliche Voda hee es un onse Kjinja vom Harn lieet.

Waut oba truarich es, es daut wan ekj am uk sea respakjt aus een Voda, eset leicht fa mie siene schwakheiten to moakjen un doano wiesen onen Jnod. Ekj mott sea oppausen! Mien Hoat es bees un well mie emma äwazeijen daut ekj daut haud kunt bāta erkjlāaren to de Kjinja aus hee, wiels ekj mea met an toop sie weet ekj waut daut baste es fa an...Rajcht jesajcht, ekj jleew ekj kaun daut bāta doonen. Dit es daut sindvolle Sot von stoltheit waut doa Frucht drajcht.

Sestren, ons fält Jnod toom onse Mana Moot toosprāakjen en āare Roll aus Voda. Wie motten ons eewen en Demoot soo daut ons Poatna siene Leidaschoft kaun blieejen en ons Heim. Wan jie Kjinja han, lot dien Maun de Leidaschoft nāmen un low am fa daut doonen. Wan du nich hast, dan dank am fa de Wāaj woo hee Gott Sienen Karakta spieejelt no de Kjinja rom junt.

### **Jebād**

*Leewa Gott, Du best ons gooda Voda. Dankscheen fa ons aunāmen en Diene Famielje, ons erhoolen met Diene Jnod, un emma vesorjen. Dankscheen fa mien Maun un fa de Wāaj woo hee Diene Leew spieejelt aus een Voda. Halp am sikj aun Die to hoolen, un halp mie am bietostonen un unjadon sennen no siene Leidaschoft.*

### **Ne Jeschicht von Preisen**

“Ekj well junt bedanken fa de 30-Doag Aunspornunk toom mien Maun Moot toosprāakjen. En onse 25 Joa von befriet sennen, sie ekj bieaun enjeworden daut ekj de oppmoakjsomkjeit velia von waut fa een leefolja, leewa Ehemaun un Voda hee es, un kjikj dolla no wua hee tookort kjemt ooda aundre Sachen waut mie stieren. Dise Aunspornunk haft mie jeholpen toom wada seenen woo jesāajent ekj sie toom am aus mien Maun han.”

### **Nodenkjen un Aunwenden**

- Deist du dien Maun siene Leidaschoft met de Kjinja unjastetten ooda die aunstrenjen jāajen am?



- Woone Enstalungen motst du wakjslen toom de Omjävunk soo moaken daut hee aus Voda mea unjastettunk kjricht un wausen kaun?
- Best du wellich dise Sachen nom Harn to äwajäwen un Am om vezeiunk froagen?

### **Deepa gonen**

Onse Kjinja seenen daut auf wie onse Mana unjastetten en äare Roll aus Vodasch ooda nich. Eenjemol es een biespel mea wieet aus Wieed. Wan de Har die aunrät von irjents Sind opp dise Städ, best du wellich ver de Kjinja am om vezeiunk to froagen? Dit kaun de baste jelääjenheit sennen am aus Voda oppbuen.

## **Dach 25: No Fräd Sträwen**

**Von Monica Hall**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Sieekj Fräd, un sträw doano dän to hoolen. ----Psalmen 34:15*

### **Aundacht**

Fräd es soont waut wie fa selfstendich nämen wan de doa es, oba ons sea fält wanet nich doa es. Reema 12:18 schrift, “Doot aules waut jie kjennen, wan daut mäajlich es, met aule Menschen Fräd to haben.” Daut jeft auntovestonen daudet nochmol aun Fräd fält wan wie ons uk noch soo sea doarom bemieejen, oba daut spornt ons uk aun aulet mäajlichste to doonen toom Fräd haben.

Diene Ehe es veleicht ne Städ von Fräd, ooda doa sent veleicht stendich striedarieen. Daut es wichtich ons selfst to unjasieekjen toom seenen auf wie no Fräd sträwen. Wan du faust jestalt hast daut dien Hoat werkjlich no Fräd sieekjt, kaust du aunfangen dien Maun Moot to moaken.

Hee es veleicht aul sea goot en no Fräd trachten. Bedank am doafäa un saj am woo wietvoll sien Hoat fa Fräd en june Ehe es. Deit hee striedarieen met aundre met Jnod un Demoot vehaundlen? Ermootich am doarenn, un räd von jewesse Tieden wua hee no Fräd trachten deed. Wan hee oba leewa jeneicht es toom oajalich entjääjen gonen, froag däm Harn no Weisheit en woo du am kaust ermootjen leewa no Fräd to sträwen. Dien Väabilt von no Fräd trachten un nich strieden woat uk ermootjen, onen daut du een Wuat sajen brukst.

### **Jebäd**

*Jesus, Du best de Frädens Held, un mien velangen es daut Fräd wudd en mien Hoat jedia'en, en miene Ehe, un Heim. Bewoa miene Tung un miene Jedanken von Wieed un Enstalungen waut doa tranen un voll oaja sent. Halp mien Maun un mie beid no Fräd to trachten soo daut Du huach jehowen wascht en onse Ehe.*

### **Ne Jeschicht von Preisen**

“Ekj kaun nich sajen woo daut passieed, oba ekj muak een Vaspräakjen fa 30 Doag goode Wieed to räden to mien Maun, un ekj beläwd een grooten wakjssel en de ieeschte Wääkj----von daut hee säd woo schmock mie leet bat mie Bloomen brinjen no de Oabeit. Daut es soo aus daut wia 8 Joa trigj ea wie befriet wieren.”

### **Nodenkjen un Aunwenden**

- Denkj aun diene Wieed, dien Toon, diene Enstalunk. Deist du ne Städ von Fräd moaken en dien Heim?
- “Eene jelinde Auntwuat stelt dän Oaja, oba een hoadet Wuat reizt toom Oaja” (Spricha 15:1). Jrebbel äwa disen Varsch utwendich lieren un däm Harn froagen no diene Tung wieekj moaken wan daut Vestemnissen jeft.

## **Deepa gonen**

Ekj hieed von een poa Lied waut jieda ne List von 10 Dinja oppschreewen waut toom stieren wieren waut de Poatna jeeenlich deed, soo aus Kjeeda rom ligjen loten ooda lot sennen. Dan vespruaken see daut see niemols wudden strieden ooda grunzen äwa waut opp de Listen wia. Stal die vää woo dit wudd sennen en diene Ehe.

## **Dach 26: Jlikja Wicht Hoolen**

**Von Shiela Dougal**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Un Jesus woss opp un neem too aun Weisheit. Un Gott un Menschen hauden Jefaulen aun am. ----Lukas 2:52*

### **Aundacht**

Korz opp ne Vesaumlunk met onse Kjoakjen Oabeida, räd de Prädja von de Jeschicht von Jlikja Wicht. Toom daut betoonen, brukt hee Jitoaren Seiden aus een Bilt von woo daut em Läwen aufspält: aunjeholt woaren. Daut Läwen es nich soo sea von jlikja Wicht kjrieen; daut es dolla soo aus aun een Jitoa Seid tuksen waut emma enjestalt mott. Wan wie vesieekjen ons Läwen en jlikja Wicht to kjrieen, dan woa wie boolt en daut es soo aus een Dukabrat vesieekjen jlikj to hoolen met doa bowen emma han un häa ranen. En Lukas 2:52, see wie Jesus kunn daut rajcht aunjeholt hoolen met Jefaulen han bie Gott un Menschen. De selsje jlikja Wicht mott jesocht woaren en daut Veheltnis met onse Mana.

Aus Christen waut uk befriet sent, woa wie een aunholen späaren tweschen ons velangen Gott to deenen un ons velangen een scheenet Veheltnis to han met onse Mana. De Ehe es een Jeschenkj von Gott, un wie sullen daut ieren, tru bliewen to ons Vespräakjen, un vesieekjen Gott to veharlichen en woo wie onse Mana leewen. Oba wan wie de Seiden von onse Läwes enstalen toom scheen hieren en Gott Siene Uaren, sull onse Ehe nich enne Wad sennen met de Seiden enstalen toom em Gloowen wausen un Leew fa Gott.

Soo aus Paulus sajcht en 1 Korinta 7, wie sellen nich bloos no onse Ehe kjikjen oba uk no däm Harn jefaulen en aules waut wie doonen. Wan wie onse Läwes enstalen met een jesundet aunholen soo aus Jesus deed, kjrie wie Jefaulen bie Gott un Menschen un kjrieen een jlikja Wicht waut aundasch nich han to kjrieen jeit.

### **Jebäd**

*Voda, halp mie von Jesus to lieren woo mien Maun to leewen un to de selsje Tiet wausen en miene Leew fa Die. Halp mie daut ieeschte no Dien Rikj to sieekjen un Diene Jerajchtichkeit, un doaderch, mucht daut mie halpen mien Maun mea Leew to jäwen. Jäw mie Weisheit wan ekj daut aunholen vom Läwen utläw soo daut Du wuascht veharlicht woaren en mien Läwen un en miene Ehe.*

### **Ne Jeschicht von Preisen**

“Wan miene Ehe uk goot es, wia ekj stääkjen jebläwen wua daut maklich wia. Dise Aunspornunk wia krakjt waut mie fäld toom mien Maun vom freschen wada mea rääkjen! Toom bloos een poa Sachen erwänen - Hee schauft sea fa mie un onse Dajchta, helt dän Hoff fein besorcht, un es froo en onse Läwes vewekjelt. Dise Aunspornunk haft mie de Uagen op jemoakt daut ekj dit (un noch mea) nich wudd

jlikjeltich nämen! Un wan ekj am emma wada bedanken kaun, besondasch ver de Mejales, waut fa een scheenet Zeichnis daut woat sennen fa an wan see sikj noch mol sullen befrieen.”

### **Nodenkjen un Aunwenden**

- Wua feelt sikj die daut aunjeholt tweschen Gott deenen un uk daut Veheltnis met dien Maun wausen moaken? Sent doa Städen waut doa fälen entostalen?
- Woo kaun daut ieeschte no Gott sieekjen die halpen dise jlikje Wicht to kjrieen en diene Ehe un opp aundre Städen en dien Läwen?

### **Deepa gonen**

Näm die de Tiet toom nodenkjen woo du daut aunholen vehandlen deist tweschen dien Deenst fa däm Harn un dien Veheltnis met dien Maun. Deist du noch mol dien Maun väätrakjen ver diene Tiet met däm Harn? Sent doa Städen wua du bie de Kjaokj Deenen deist waut die moaken diene Ehe vesiemen? Froag Gott die Weisheit to jäwen soo daut du dien Läwen un Ehe “enstalst” no de Melodie waut Am jefelt fa die.

## **Dach 27: Sien Moot Bestädjen**

**Von Kelly Needham**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Siet stoakj un von Hoaten mootich, aul jie dee june Hopninj em Harn haben! ----*  
Psalmen 31:25

### **Aundacht**

Du best meist derch met de 30-Doag Dien Maun Moot Toosprääkjen Aunspornunk! Daut haft veleicht besondasch väl Moot jebrukt nich to kjritisieeren un emmawajch bloos ermootjende Wieed räden to dien Maun. Dis Moot es bloos määjlich wan wie ons vetruen em Harn saten un no Am luaren. Un no soon Moot well wie kjikjen un preisen en onse Mana.

Brow sennen es nich “Hoat hanstalen”, un daut es uk nich onen angst sennen, ooda onen besorchnissen, un negatiewen Erfolg. Wua sitst du dien Maun daut doonen waut doa rajcht es wan daut uk wee deit? Steit hee opp fa waut fa aundre rajcht es, wan daut uk nich de Mood es? Schauft hee doano han daut ojjerajchtichkjeit nich bestonen saul? Well hee ombedinjt de Woarheit han? Kjricht hee velust om daut hee die ooda june Famielje beschitzen kaun? Wies am de Dinja wua hee brow es un aul ea jewast es, un dank am fa een Väabilt saten fa die.

Un froag Gott fa dän Mott waut *die* fällt vondoag. Hool diene Uagen aun Gott, un lua no Am toom de Endanissen moaken en june Ehe waut du hopst to seenen. Soo aus de Heilje Frues waut “sikj nich ferchten”, un de Hopninj en Gott hauden (1 Petrus 3:1-6). Hee woat die nich teischen.

### **Jebäd**

*Voda, dankscheen fa woo mien Maun waut romjeft om onse Famielje un aundre. Fa jieda Sach wua hee brow es, auf grootet ooda kjlienet, sie ekj dankboa. Halp mie niee Wäaj to seenen wua ekj am stoakjen un oppbuen kaun met miene Wieed. Wua hee angst haft ooda nervees es, halp am Die to vetruen un aun Diene Krauft länen.*

### **Ne Jeschicht von Preisen**

“Ekj hab de Jebäda aul fa 29 Doag jebät, un ekj kaun junt sajen, wada häastalen haft aunjefongen. Mien Maun un ekj sent uteneen jewast fa 18 Joa em gaunzen. Onse Kjinja sent aul oppjewossen. Oba wie deenen een Wundavollen Gott. Mien Maun es oppe Wajch nohus!”

### **Nodenkjen un Aunwenden**

- Waut deist du veleicht äwaseenen wua dien Maun brow es?
- Waut jeft dien Maun daut mieeschte angst un besorchnis? Näm vondoag Tiet toom krakjt fa daut bäden daut Gott wudd am brow moaken opp de Städ.

## **Deepa gonen**

Haft dien Maun een Lieblinkjs Film von Kjrlich? Soona waut Acht jeft opp woo Mana sikj brow hanjeewen. Wuaron deist nich aunbeeden daut met am toop to kjikjen un dan näm Tiet no däm Film kjikjen toom am sajen wua du seenen kaust daut hee brow es. Wan dien Maun derch ne besondasch enjstliche Tiet jeit, schriew am een Breef un saj am daut du fa am bäden deist un daut du 100% hinja am steist, un am Moot toosprakjst toom väärwajch gonen. Low waut hee brow deit toom die beschitzen, june Ehe, june Famielje, ooda jun Heim.

## **Dach 28: De Scheenheit von Deemoot**

**Von Kelly Needham**

### **Diene Aunspornunk**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Wäa Forcht fa däm Harn haft, lieet weis sennen; ieescht kjemt de Deemoot, dan de Iea.*  
----Spricha 15:33

### **Aundacht**

Deemootich waundlen kaun schwoa sennen wääjens daut meent onse rajchten oppjäwen. Deemoot moakt daut mäajlich onse Mana to ieren wan wie weeten daut de em orrajchten sent. Deemoot jeft ons de Krauft ons nich to rajchnen wan wie weejefeelen kjrieen von onsen Maun. Deemoot jeft ons Mul Wieed toom oppbuen wan ons jankat kjritisieeren. Moak dise Moonat stoakj to enj met no ekstra Deemoot froagen vondoag. Un hool em Jedenkj, Gott jeft Jnod no de Deemootje (1 Petrus 5:5).

Nu frog däm Harn die to halpen Deemoot to seenen en dien Maun. Freit hee sikj jieren met waut aundre leisten onen to puchen met waut hee haft jedonen? Kaun hee von aundre lieren, bie de Oabeit ooda bie de Kjoakj ooda sestwua? Es hee froo Gott Sien Wuat unjadon? Sat hee daut tosied waut am jankat fa aundre? Es hee opprechtich met wua hee fälen deit un siene needichkjeit fa Gott Siene Jnod? Vondoag, wies no een bewies von Deemoot waut du en dien Maun jeseenen hast, eendoont woo kjlien.

Een demootja Maun es soona waut to vetruen jeit un secha es oba foaken nich soon Maun waut onse Kultua huach aansitt. Dan lot dien Maun weeten woo wieetvoll sien bewies von Demoot es fa die un waut fa een Väärajcht daut es befriet to sennen met een Maun waut daut wichtich es Christus dit nospieejlen. Dank am fa een Väabilt saten waut du kaust no doonen.

### **Jebäd**

*Voda, jäw mie de Krauft vondoag mie to demootjen. Wies mie Städen wua stoltheit vestoaken es, un jäw mie de Jnod disen stolt to bekjanen to mien Maun un no vezeiunk sieekjen bie am. Jäw mie Uagen waut no bewies von Demoot kjikjen en mien Maun vondoag ennestäd no fälasch un tookort komen. Halp mie daut tosied to lajen waut mie traft so aus Du deetst, Har Jesus, un mien Maun vondoag froo deenen.*

### **Ne Jeschicht von Preisen**

“Ieescht haud ekj jedocht ekj wudd aum enj von dise Aunspornunk mien Maun daut sajen, oba soo aus daut noda nom enj kjemt sie ekj nich mea secha daut ekj woa. Ekj jleew ekj woa bloos wieda to am sajen waut ekj aun Dach 3 säd. Hee fruach, ‘Wuorum best du dise latste poa Doag soo seet un fein jewast to mie? Un ekj auntwuad, ‘Oo, de Har schauft bloos en mien Hoat wua daut die un onse Ehe aunjeit, un ekj vesieekj derch Siene Jnod daut niemols mea jlikjeltich to nämen.’”

### **Nodenkjen un Aunwenden**



- Waut helst du faust aus dien rajcht en diene Ehe?
- Waut fa weefeelelen un fälasch helst du faust? Näm die een bät Tiet toom dise loosloten no Gott un läs Filippa 2:5-8, un froag Gott die de demootje Enstalunk von Christus to jäwen.

### **Deepa gonen**

Lua nich no waut groosoatjet bat du dien Maun lowen deist fa siene Demoot. Kjijk no daut klanste Sot Kuarn doavon un low am daut. Sieekj enne Bibel no Varschen äwa Deemoot un schriew daut opp ne Koat fa dien Maun, un saj am woo dankboa du best fa jewesse bewies von Deemoot.

## **Dach 29: Fa Jerajchtichkjeit Stonen**

**Von Heidi Jo Fulk**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die aun am jefelt----un saj aundre daut uk von am!

### **Bibel Varsch**

*Wäa no jerajcht sennen un truhoatje Leew sträft, finjt Läwen, Jerajchtichkjeit un Iea. --- Spricha 21:21*

### **Aundacht**

Wan du batem enj von dise Aunspornunk kjemst, näm die Tiet toom denkjen äwa dien Maun siene Auntwuat no daut schljachte en onse Kultua, waut enne Norechten kjemt, un enne Welt. Erkjant dien Maun beeset un dreit wajch doavon? Opp waut fa Wäaj sträft hee no Jerajchtichkjeit---un läft no Gott Sien Motstock no sien Vespräakjen von Jemeenschoft met am un met die?

Vestonen daut Sind es ieeschtens jaaen Gott, sull ons aunspornen leewa en Jerajchtichkjeit to waundlen, soo aus Joseph em Oolen Testament, waut doa wajch rand von Potifar siene Fru äare beese Aunschläaj (1 Mose 39:9). Sieekj no mea vestentnis äwa Gott Sienen Karakta un Siene Wäaj met dien Maun toop. Von korte unjahoolungen äwa dän Prädja siene Bootschoft oppe Wajch nohus vonne Kjoakj ooda toop derch een Buak enne Bibel läsen, doa sent väl Wäaj woo jie junt omzajcht kjennen halpen Gott Siene Jerajchtichkjeit bäta vestonen. Dan, derch dän Heiljen Jeist Siene Halp, woa jie kjennen soo läwen wuatoe Gott junt beroopen haft (Efeesa 4:1)

### **Jebäd**

*Himmlischa Voda, moak mien Maun sien Väanämen stoakja toom stoakj stonen jaaen de Welt, daut Fleesch, un däm Diewel. Beschitz am fa beeset un halp am denkjen aun siene needichkjeit fa Diene Halp toom wajch ranen doavon un en Jerajchtichkjeit waundlen. Lot am hungrich bliewen no Die soo daut nuscht aundret toofrad moakt. Halp mie siene Entscheidungen to lowen waut Die Väatrakjen un ieren.*

### **Ne Jeschicht von Preisen**

“Dise Aunspornunk holp daut Veheltnis tweschen mie un mien Maun wada opp jlikja Wicht to komen auset krakjt batem toop faulen wia. Daut brocht fresche bediedunk un een bätret utseenen en ons Veheltnis waut wie dochten veloaren wieren. Daut holp mie derch schwoare Tieden von weejefeelen to gonen, un ekj dank Gott fa jieda Dach waut Hee no miene Jebäda horcht. Dach 30 wia scheen un uk truarich---ekj wia froo daut ekj daut soo wiet jemoakt haud un dankboa een Veheltnis to han met mien Maun oba schod daut ekj doamet toom enj jekomen wia.”

### **Nodenkjen un Aunwenden**

- Kaust du die von irjentswaut besondret denkjen aus dien Maun Jerajchtichkjeit väatrock en jun Heim?

- Sitst du Jerajchtichkjeit en de läwes von Menschen rom die? Räd von dise goode Vääbilda to dien Maun toom june Hoaten beid Moot jäwen.

### **Deepa gonen**

Low dien Maun wan hee schljachtet ensitt un sien Rigjen dreit. Wan die ne Sach denkjt wua dien Maun fa Jerajchtichkjeit stunt, moak am doa vondoag aun denkjen----un saj am woo dankboa du best. Un bäd fa am----daut hee wudd de Krauft han fa Jerajchtichkjeit to stonen un daut sien Vääbilt wudd een Endruck han waut doa bliewen wudd oppe Famielje.

## **Dach 30: Frind Sennen Fläajen**

**Von Mindy Kroesche**

### **Diene Aunspornunk:**

- Saj nuscht negatiewet von dien Maun----to am ooda to aundre von am.
- Saj dien Maun irjentswaut waut die jefelt aun am----un saj aundre daut uk von am!

### **Bibel Varsch**

*Soo scheen es mien scheensta, soon Schauz es mien Schauzkje. ----Leet 5:16*

### **Aundacht**

Eent von daut baste waut miene Mame mie fa Rot jeef wia daut ekj nich bloos sull dän Maun goot sennen wäm ekj frieen wudd, oba ekj sull am uk aus een Frint han. Ekj neem mie disen Rot aun. Mien Maun un ekj wieren Frind fa een gaunzet Joa ea wie aunftongen toop to gonen, un wie han dit Frintstekj wieda jefläajcht. Derch de Joaren, hab wie soont jedonen waut ons beid scheen jeit, lachen wäajens sposjes em You Tube, un Tiet tosied saten toom äwa dän Dach vetalen----daut scheene, daut schwoare, un daut waut aule Dach väajeit.

Frind sennen kjemt nich emma von selfst. Wan wie een stoot nich sent toop jewast, daut noch emol stuckat, ooda de aunstrenjunk späaren von enne sindvolle Welt läwen, kaun daut leicht sennen uteneen to komen. Dan mott wie ons väanämen ons Veheltnis ---un Frintstekj--- trigj oppem rajchten Wajch nopp to stieren.

Wan du batem enj kjemst met dit 30-Doag Dien Maun Moot Toosprääkjen Aunspornunk, jrebbel äwa Wäaj woo du kaust daut Frintstekj met dien Maun fläajen. Denkj nich bloos daut hee daut weet daut die dit Poat von jun Veheltnis wieetvoll es; lot am weeten daut hee dien leefsta es un dien basta Frint.

Wan du die wietauf feelst von dien Maun, bäd daut Gott junt wudd halpen en niee Wäaj vebinjen. Gott haft junt aum aunftank toop jebrocht, un Hee kaun jun Veheltnis deepa moaken un nieet Läwen doa nenn pusten.

### **Jebäd**

*Jesus, dankscheen fa daut Frintstekj waut Du mie met mien Maun jejäft hast----fa onse twee veschiedne Läwes nämen, un ons "Een Fleesch" moaken, un ons loten eena dän aundren soo vestonen aus kjeen aundra kaun. Dankscheen fa woo Du dise latste 30 Doag jebrukt hast en onse Ehe. Muchten de Säajnungen waut wie derch dise Aunspornunk beläft han wausen en de Doag ver ons. Un moak miene Leew fa mien Maun emma deepa, daut hee mucht weeten daut hee mien Leefsta un mien Frint es.*

### **Ne Jeschicht von Preisen**

“Ekj sie aunjerieet jeworden un werkjlich jesääjant von dise 30-Doag Aunspornunk fa mien Maun. Ekj woa en woo wieetvoll un wichtich daut es woo ekj räd enne Ehe. Ekj bemoakj daut ons befriedet Läwen bloos soo seet es aus waut ekj sie to am. Wan ekj wieda velenjd go en dise Reis derch Gott Sien Wuat, well ekj ne Fru sennen no Gott Sien Hoat. Dankscheen fa mie oppmoakjsom moaken woo wichtich miene Wieed sent to woo scheen mien Maun daut jeit.”

## **Nodenkjen un Aunwenden**

- Woo dicht wuascht du sajen wieren du un dien Maun aus Frind?
- Opp waut fa Wääj wuascht du en dit Stekj entwekjlen kjennen?
- Waut es daut goode von dien Maun aus dien basta Frint han?

## **Deepa gonen**

Räd met dien Maun äwa woo jie kjennen jun Frintstekj deepa moaken. Daut kunn sennen waut toop doonen toom Scheengonen wua jie nich de jeeenliche Oppgowen han, een Buak läsen un ne goode unjahoolunk han doaräwa, ooda jieda owent toop bäden verem schlopen gonen. Wääjens jieda poa Lied eensichoatich es, woat dit veschieden sennen fa jieda Ehe. Dan moakt Tiet toom daut vollbrinjen.

## **Toom Schluss: De Aunspornunk Jeit Wieda**

**Aunleidunk:** Welwe wieda wälen no Gott Sien Wuat to dreien.

### **Mosta:**

Leewe Freundin, daut es ne Freid jewast jieda Dach no die to komen toom toop de Woarheit betrachten. Dise email Aunspornunk es veleicht toom enj, oba de Reis von enne Woarheit wausen es nich.

*Onse Hoaten Nie Moaken* haft een eefachet Ziel----Frues beroopen no de Frieheit, vollkomeheit, un fruchtboakjeit en Christus. Aules waut wie doonen, uk dise email Aunspornunk, kjemt von een velangen toom seenen woo du kaust verewajch komen en dien Waundel met Christus.

Wan wie aun junt denkjen, komen de Wieded enne Jedanken waut Christus bäden deed em Goaden Getsemane:

“Heilj an en de Woarheit, dien Wuat es de Woarheit” (Johanes 17:17)

Gott Sien Wuat ve’endat ons. Dan welwe wieda toop no Gott Sien Wuat dreien en de Doag ver ons.

[Onse Hoaten Nie Moaken.com](http://OnseHoatenNieMoaken.com) es voll von Halp Meddel toom die halpen daut to doonen. Soo aus...

Praktische, biblische blog posts:

- Finj Woarheit fa jieda Staup em Läwen bie [WoareFrues.com](http://WoareFrues.com).
- Posts läsen von Leidasch fa Leidasch opp daut Leida Vebindunk blog.
- Junge Frues, lieet Lääjes erkjanen un de vetuschen met Gott Siene Woarheit bie [LääjesWautJungeFruesJleewen.com](http://LääjesWautJungeFruesJleewen.com).

Bediedunksvolle Bibel Studium soo aus:

- [Abigail: Met De Schwoare Menschen En Dien Läwen Foadich Woaren](#)
- [Elizabeth: Met Enteschunk Foadich Woaren](#)
- [Esther: Gott Sien Plon Vetruen](#)
- [Ne Städ Von Stelle Ru: Jemeenschoft Met Gott Finjen Derch Däachliche Aundachtstiet](#)
- [Am Sieekjen: De Freid Beläwen Von Perseenliche Erwakjunk](#)

Un bejeistaliche Video Zeichnissen soone aus:

- [Katie Äare Jeschicht: Wan Nich, Hee Es Doch Noch Gott](#)
- [3 Jenerazjoonen Von Jeistliche Läwen-Jäwasch](#)
- [Ne Ehe Wada Häajestalt Derch Vollet Vezeien](#)

Wie han uk 2 Däachliche Radio Sendungen un podcasts waut jemoakt worden toom junt halpen verewajch komen en Christus. Finj mea ut bie [OnseHoatenNieMoaken.com](http://OnseHoatenNieMoaken.com). Onse Hopninj es daut jie am werklich kjanen woaren, un Am jenuach vetruen toom

jehorchen, leewen, un ne Freid han aun Am. Welwe wieda toop no Am dreien.

Säajnungen,

De *Onse Hoaten Nie Moaken* Grupp

### **Onse Schriewasch**

#### Leslie Bennett

Leslie wont en de Lowcountry von Sied Carolina wua see niemols meed woat von wundascheene Sonn unjagank to seenen, biesied läwendje Ieekjen Beem gonen waut met Spanish Moss bewossen sent, un seeten Tee drinkjen unja äa Schautendack (met Zitroon, fasecha!). No 36 Joa befriet sennen, sajcht Leslie doa es noch emma nieet to lieren awa eenem sien Maun!

#### Erin Davis

Erin wont opp ne Schop Foarm enne Meddwasten. See jleicht jreene Schaublen plaunten, met de Famielje toop Dominoes spälen, un met de kjliene Grupp vonne Kjoakj toop komen. See befried sikj met äa Maun, Jason, boaft oppem Saunt aune kaunt Mää jroz äwa 20 Joa trigj. Von dan, haft see jeliheet daut de Ehe dreit sikj nich rom äa un daut Leew waust en ne Grunt von hanjäwendet Opfa.

#### Shiela Dougal

Shiela wont en Phoenix oba kjemt von ne kjliene Städ en Oregon. See jleicht Seep moaken, ne goode Lävrens Jeschicht läsen, Jedichta schriewen, en een Doagesbuak schriewen, un aun kjeele Doag wiet gonen. Fa äwa 25 Joa, haft Gott jeschaufft en äare Ehe toom Siene Truhoatichkeit wiesen un Äa loten de Freid schmækjen waut doa kjemt von Christus folgen un ons selfst deemootjen toom een aundren leewen fa Siene Iea.

#### Heidi Jo Fulk

Heidi un äa Maun han derch de Joaren veschiedne Wääj jefungen toom vebungen woaren, derch de Tieden von verem befrieen, fresch befriet sennen, un de Elren sennen fa junge Kjinja un elre Kjinja. See sent entschieden toom toop vebungen woaren toom äare Famielje stoakjen un Christus ut tieekjen.

#### Betsy Gómez

Betsy wont en de Dallas Jääjent met äa Maun Moisés, un äare 3 Kjinja. Äa jeit daut scheen spazieren bieaun biem scheenet Äten äten un äa Heim op moaken fa Jemeenschoft. See un äa Maun jleichen toop Films kjikjen un opp Reisen foaren. See han de Kraufft von daut Evangelium jeseenen en äare Ehe schaufen un de scheenheit von Gott vetruen eendoont waut.

#### Monica Hall

Monica moakt äa Heim oppem Launt em Bible Belt. See vebrinjt äare Doag met äare Kjinja School jäwen un rom fieren, no Städen sieekjen wua see han foaren kjennen, un sieekjen no Bieekja waut see en eent derch läsen well. Gott haft äa korz kloara jewäsen woo wichtich daut es praktische, besondre Wääj finjen, toom äa Maun halpen, soont aus waut unjasieekjen met am toop ooda jieda zemorjes sien Huntkje rut nämen fa een Spaziagank.

#### Mindy Kroesche

Mindy wont en ne kjliene Staut em Meddwasten met äa Maun un 2 Kjinja, oba em Hoat jehieet see oppem Launt. Äa jeit daut scheen nom Wota foaren met äare Famielje, toop jerolt setten met een niesjet Buak, un utfinjen woone Städen dän scheensten Himbeeren Mocha Koffe aunbeeden. Met äa basten Frint befriet fa mea aus 20 Joa, wiest Gott äa jieda Dach daut see äa Maun nich jlikjeltich nemt un am daut baste Moot toosprääkjen.

### Kelly Needham

Kelly Needham wont en de Dallas Jääjent met äa Maun un 3 Kjinja. Wan see een Dach frie haft deit see Puzzles toopstalen, läsen, ooda met Frind spazieren. No 12 Joa befriet sennen, mott äa noch emma denkjen jeholpen daut see nich Wied brukt toom kjritisieren un trajchtsajen oba leewa Wied räden von Moot toosprääkjen un Dankboakjeit.